

摘藻堂四庫全書薈要

子部

欽定四庫全書薈要

子部

御定淵鑑類函卷二百六十四

臣紀昀詳校
詳校官兵部主事臣雷純

欽定四庫全書薈要卷一萬一千七百十二

子部

御定淵鑑類函卷二百六十四

人部二十三

哀傷

哀傷一

原詩曰我心憂傷惄焉如擣 禮記曰墟墓之間未施

哀于民而民哀 又曰知生者弔知死者傷 又曰傷

哉貧也生無以為養死無以為禮 焦贛易林曰秋風

生哀華落悲心 文子曰九夷八狄之哭異聲而皆哀

秦州記曰隴西郡有隴山山東人升此而顧瞻者莫
不悲思哀傷

哀傷二

原詩序曰日月衛莊姜傷已也遭州吁之難傷已不見
荅于先君以至困窮 說苑曰鮑叔死管仲舉上衽而
哭之泣下如雨從者曰非君臣父子也管仲曰生我者
父母知我者鮑子也士為知己者死而況為哀乎 左
傳曰魯襄仲殺公子惡及視而立宣公夫人姜氏歸于

齊哭而過市曰天乎仲為不道殺嫡立庶市人皆哭魯

人謂之哀姜 又曰秦不哀我喪而伐我同姓 禮記

曰陽門之介夫死而司城子罕哭之哀而民說 又曰

孔子過泰山側有婦人哭于墓者而哀夫子使子路問

之對曰昔吾舅死于虎吾夫又死焉今吾子又死焉

又曰孔子過衛遇舊館人之喪夫子入哭之出使子貢

脫驂而賻之曰予向者入而哭之遇于一哀而出涕

琴操曰孔子遊于泰山見薪者哭甚哀孔子問之薪者

曰吾自傷故哀耳

家語曰閔子騫三年喪畢見于孔

子與之琴使之絃切切而悲孔子曰君子也哀未盡能

斷之以禮

列子曰燕人生長于楚及老而還本國過

晉國同行者誑之指城曰此燕國之城其人愀然變容

指社曰此君里之社乃喟然而歎指舍曰此君先人之

廬乃潛然而泣指隴曰此君先人之塚其人哭不自禁

吳志曰呂岱親愛徐原原性忠壯好直言及原死哭

之甚哀曰益友不幸岱復于何聞過 王隱晉書曰庾

衮兄子翕卒衮既哀其孤又痛其成人而未娶撫柩而號每哭聽者皆泣人不哀其喪感其哀也 又曰阮籍

鄰家女未嫁而死籍往哭之甚哀 增通鑑曰程顥卒

楊時設位哭寢門而以情赴告同學者一時士大夫識與不識莫不哀傷 元列傳曰王結卒公卿唁于朝士大夫弔于家曰正人亡矣

哀傷三

增哀籲

辛酸

書以哀籲天哀號呼天也 文選悽淚辛酸

惆悵

悲涼

文選心惆悵而哀離
韻府悲涼見此心

慨息

懊咿

文選撫長劍而慨
又含哀懊咿

內悲也

填膺

飲恨

文選悲來填膺
又飲恨吞聲

惓惓

酸辛

文選

惜惓惓悽悲傷之意
悲慘也臨觴多哀楚悽

哀楚酸辛皆
惓惓酸辛

掩噓

噓唏

韻府

忽驚薤露曲掩噓東山雲注悲
愁歎也又曰噓唏哀歎貌

弔影慙魂

含酸茹

歎

文選朝行弔其影夜寢慙其魂
皆自怨傷意也又含酸茹歎

哀傷四

增悲纏

謂悲哀之情
纏繞于心也

擗標

拊心
而悲

七哀

魏曹子建
有七哀詩

八哀

杜甫

慘毒

藝文會當隔山河軌
觸懷慘毒悲甚也

辛楚

文選懷
慨含辛

楚

憤懣

文選憤懣
歎之盛

哀傷五

原詩魏阮瑀七哀詩曰丁年難再遇富貴不重來良時
忽一過身體為土灰冥冥九泉室漫漫長夜臺身盡氣
力索精魂靡所迴嘉穀設不御旨酒盈觴杯出壙望故
鄉但見蒿與萊又詩曰臨川多悲風秋日苦清涼客
子易為戚感此用哀傷攬衣久躑躅上觀心與房三星
守故次明月未收光鷄鳴當何時朝晨尚未央還坐長

歎息憂憂難可忘

魏王粲七哀詩曰西京亂無象豺

虎方遘患復棄中國去遠身適荆蠻親戚向我悲朋友

追相攀出門無所見白骨蔽平原南登灞陵岸回首望

長安悟彼下泉人喟然傷心肝又詩曰荆蠻非我鄉

何人久滯淫方舟逆大江日暮愁我心山岡有餘映巖

阿增重陰流波激清響猴猿臨岸吟獨夜不能寐攝衣

起撫琴絲桐感人情為我發悲音晉張載七哀詩曰

秋風吐商氣蕭瑟掃前林陽鳥收和響寒蟬無餘音朱

光馳北陸浮景想西沈顧望無所見唯覩松柏陰肅肅
高桐枝翩翩孤栖禽仰聽離鴻鳴俯聞蜻蛚吟哀人易
感傷覽物增悲心 潘岳哀詩曰淮如葉落樹邈若雨

絕天雨絕有歸雲葉落何時連山氣冒岡嶺長風鼓松
柏堂虛聞鳥聲室暗知日夕晝愁奄逮昏夜思忽終昔
展轉獨悲窮泣下霑枕席人居天地間飄若遠行客先
後詎能幾誰能弊金石 宋顏延之辭難潮溝詩曰徘徊
春郊甸俯仰引單襟一塗苟不豫百慮畢來侵永懷

交在昔有願譽瑟琴寫言勞者事將用慰亡簪 齊謝

朓銅爵臺妓詩曰總帷飄井幹尊酒若平生鬱鬱西陵

樹詎聞歌吹聲芳襟染淚跡嬋娟空復情玉座猶寂寞

况乃妾身輕 梁簡文帝傷美人詩曰昔聞倡女別蕩

子無歸期今似陳王歎流風難重思翠帶留餘結苔階

沒故基圖形更非是夢見反成疑薰鑪含好氣庭樹吐

華滋香燒日有歇花落無還時 沈約丞相第詣世子

車中作詩曰庶公失權勢門館有虛盈貴賤猶如此况

乃曲池平高車塵未滅珠履故餘聲賓階綠錢滿客位
紫苔生何當九原上鬱鬱望佳城 增又悼亡詩曰去

秋三五月今秋還照梁今春蘭蕙草來春復吐芳悲哉
人道異一謝永銷亡簾屏既毀撤帷席更施張遊塵掩
虛座孤帳覆空牀萬事無不盡徒令存者傷 又傷王

融詩曰元長秉奇調弱冠慕前踪眷言懷祖武一簣望
成峯塗艱行易跌命舛志難逢折風落迅羽流恨滿青
松 何胥傷章公大將軍詩曰百萬橫行罷三千白日

新短簫應出塞長笛反驚鄰槐庭慘芳樹舞閣思陽春
所悲金谷妓坐望玉關人 原梁蕭子範入元襄王第

詩曰伏軾窺東苑收淚下玉橋昔時方轂處于今共寂
寥夾池猶裊裊仙榭尚迢迢一同西靡柏徒思芳樹蕭
王筠和蕭子範入元襄王第詩曰昔入睢陽苑連步
披風雲今遊故臺處迴望閭無人皓壁留餘篆蕙圃有
餘芬行人皆隕涕何獨孟嘗君 何遜行經范僕射故
宅詩曰旅葵應蔓井荒藤已上扉寂寂空郊暮無復車

馬歸潏潏故池水蒼茫落日暉間寂今如此行客盡霑
衣 又銅爵臺妓詩曰秋風木葉落蕭瑟絃管清望陵
歌對酒向帳舞空城寂寂檐宇曠飄飄帷幔輕曲終相
顧起日暮松柏聲 劉孝綽銅爵臺妓詩曰爵臺三五

日歌吹似佳期定對西陵晚松風飄素帷危絃斷更接
心傷于此時何言留客袂翻掩望陵悲 劉孝威過康

王第宅詩曰入梁逢故苑渡薛見餘宮尚識招賢閣猶
懷愛士風靈光一超遠行館復朦朧洞門餘舊色甘棠

留昔叢送禽悲不去過客慕難窮 庾肩吾亂後經吳

郵亭詩曰郵亭一迴望風塵千里昏青袍異春草白馬

即吳門獫戎梗伊洛雜種亂輟輶輦道同關塞王城似

太原休明鼎尚重秉禮國猶存殷牖文雖蹟堯城吏轉

尊泣血悲東走橫戈念北奔方憑七廟略誓雪五陵冤

人事今如此天道共誰論 周庾信傷周處士詩曰冥

漠爾遊岱悽涼予向秦誰言異生死同是不歸人悵然

張仲蔚悲哉鄭子真三山猶有鶴五柳更應春遂令從

渭水投釣往江濱 增又傷王司徒褒詩曰昔聞王子

晉輕舉逐神仙謂言君積善還得嗣前賢四海皆流寓
非為獨播遷豈意中台裂君當風燭前茂陵忽移病淮
陽實未痊侍醫愈默默神理遂綿綿永別張平子長埋
王仲宣柏谷移松樹陽陵買墓田陝路秋風起寒堂已
甌焉丘楊一搖落山火即時燃昔為人所羨今為人所
憐世途旦復旦人情玄又玄故人傷此別留恨滿秦川
薛德音悼亡詩曰鳳樓簫曲斷桂帳瑟絃空畫梁纔

照日銀燭已隨風苔生履跡處花沒鏡塵中唯餘長簾
月永夜何朦朧 陳張正見銅雀臺詩曰荒涼銅雀晚
搖落墓田通雲慘當歌日松吟欲舞風人疏瑤席冷曲
罷總帷空可惜年將淚俱盡望陵中 又傷韋侍讀詩

曰懷經侍北海蘊義盛西河高風落迴照逝水役驚波
柳下悲風急山陽秋氣多宿草摧書帶寒松脆女蘿無
復華陰市空餘蒿里歌 原又傷顧野王詩曰獨酌一
樽酒高咏七哀詩何言蒿里別非復竹林期階荒鄭公

草戶閒董生帷人隨暮槿落客共晚鶯悲年髮兩如此
傷心獨幾時 又和張源傷往詩曰小婦當壚夜夫婿
凱師年正歌千里曲翻入九重泉機中未斷素瑟上本
留絃空帳臨窓掩孤燈向壁燃還悲塞壘曙松短未生
煙 增陰鏗和悼亡詩曰畫梁朝日盡芳樹晚花辭忽
以千金笑長作九泉悲鏡前塵劇粉機上網多絲戶餘
雙入燕牀有一空帷名香不可得詎見反魂時 隋劉
斌傷牛尚書弘詩曰名臣不世出百工之所求況乃非

常跼遭逢興運秋
佇聞和鼎實行當
奉介丘高衢翻稅
駕閱水遽遷舟
傳呼更何日
曳履聞無由
歸魂藐修路
征棹艤邗溝
林薄長風慘
江上寒雲愁
夜臺終不曙
遺芳徒自留
唐孔紹安傷顧學士詩曰
迢遞雙嶠道
超忽三川濶
此中俱失路
思君不可思
遊人行變橘
逝者遽焚芝
憶昔江湖上
同咏子衿詩
何言陵谷徙
翻驚鄰笛悲
陳根非席卉
總帳異書帷
與善成空說
殲良信在茲
今日嚴夫子
哀命不哀時
褚亮傷李少府正己詩

曰勞息本相循悲歡理自均誰能免長夜惜爾正青春
邁德惟家寶生才諒國珍高文綴翡翠茂學掩麒麟述
作紛無已言談如入神斷腸雖累月分手未盈旬輔嗣
俄長往顏生即短辰聲華滿昭代形影委窮塵禪草迴
中使生芻引弔賓同遊祕府日方駕直城闔並拜黃圖
右分漕清渭濱風期嵇呂好存沒范張親虛座懷王述
遺篇慟景純精靈與豪翰千祀壽何人元行恭過故
宅詩曰頽城百戰後荒宅四鄰通將軍樹已折步兵途

轉窮吹臺有山鳥歌庭晡夜蟲草深斜逕滅水盡曲池

空林中送明月是處來春風唯餘一故井尚夾兩株桐

王勃傷裴錄事喪子詩曰蘭階霜候早松露空臺深

魄散珠胎沒芳銷玉樹沈露文晞宿草烟照慘平林焚

芝空歎息流恨滿籬金駱賓王傷祝阿王明府詩曰

洛川貞氣上重泉惠政融含章光後烈繼武嗣前雄與

善良難驗生涯忽易窮翔鳬猶化履狎雉尚馴童錢滿

荒階綠塵生虛帳紅夏餘將宿草秋近未驚蓬煙晦泉

門閉日盡夜臺空誰堪孤隴外獨聽白楊風 杜審言
代張侍御傷美人詩曰二八扉掩帷屏寵愛空淚痕
銷夜燭愁思亂春風巧笑人疑在新妝曲未終尚憐脂
粉氣留著舞衣中 楊炯和曹司功傷姬人詩曰昔時

南浦別竊怨寶琴絃今日東方至鸞消珠鏡前水流衝
砌咽月影向窓懸妝匣棲餘粉薰爐滅舊烟晚庭吹玉
樹寒帳委金蓮佳人不再得白日幾千年 宋之問傷
曹娘詩曰可憐寂寞去何之獨立丰茸無見期君看水

上芙蓉色恰似生前歌舞時一前溪妙舞今應盡子夜

新歌遂不傳無復綺羅嬌白日真將珠玉閉黃泉二又

過史正議宅詩曰舊交此零落雪泣訪遺塵劔杭傳好

事池臺傷故人國香蘭已歇里樹橘猶新不見吳中隱

空餘江海濱張說過庾信宅詩曰蘭成追宋玉舊宅

寓辭人筆湧江山氣文驕雲雨神包胥非救楚隨會反

留秦獨有東陽守來嗟古樹春杜甫八哀詩曰恐懼

祿位高悵望王土窄不得見清時嗚呼就窀穸永繫五

湖舟悲甚田橫客千秋汾晉間事與雲水白

王司空
思禮

青蠅紛營營風雨秋一葉內省未入朝死淚終映睫大
屋去高棟長城掃遺堞平生白羽扇零落蛟龍匣雅望
與英姿惻愴槐里接三軍晦光彩烈士痛稠疊直筆在
史臣將來洗箱篋吾思哭孤冢南紀阻歸楫扶顛永蕭
條未濟失利涉疲苶竟何人灑淚巴東峽

李司徒
光弼

烟

烟一心在沈沈二豎嬰顏回竟短折賈誼徒忠貞飛旄
出江漢孤舟轉荆衡虛無馬融笛悵望龍驤空餘老

賓客身上愧簪纓

鄭國公
嚴公武

川廣不可泝墓久狐兔鄰

宛彼漢中郡文雅見天倫何以開我悲泛舟俱遠津溫

溫昔風味少壯已書紳舊遊已磨滅哀謝多酸辛

汝陽
郡王

璉

長嘯宇宙間高才日淪替古人不可見前輩復誰

繼鐘律儼高懸鯤鯨噴迢遞坡陀青州血蕪沒汶陽瘞

哀贈竟蕭條恩波延揭厲子孫存如綫舊客舟凝滯君

臣尚論兵將帥接燕薊朗咏六公篇

公有張相等五王
伯狄相六公詩

憂來豁蒙蔽

秘書監
李邕

結交三十年吾與誰遊行滎陽

復冥冥罪罟已橫眉嗚呼子逝日始泰即終蹇長安米
萬錢凋喪盡餘喘戰伐何當解歸帆阻清汙尚纏漳水
疾永負蒿里餞

秘書少監
蘇源明

天長眺東南秋色餘魍魎

別離慘至今班白徒懷曩春深秦山秀葉墜清渭朗劇
談王侯門野稅林下鞅操紙終夕酣時物集遐想詞場
竟踈濶平昔濫吹獎百年見存沒牢落吾安放

故著作
郎鄭虔

千秋滄海南名繫朱鳥影歸老守故林戀闕悄延頸
波濤良史筆蕪絕大庾嶺向時禮數隔制作難上請再

讀徐孺碑猶思理烟艇

右僕射
張九齡

又過陳拾遺故宅詩

曰拾遺昔日居大屋尚修椽悠揚荒山日慘澹故園煙

位下曷足傷所貴者聖賢有才繼騷雅哲匠不比肩到
今素壁滑灑瀚銀鈎連盛事會一時此堂豈千年終古
立忠義感遇有遺篇 又哀江頭詩曰少陵野老吞聲

哭春日潛行曲江曲江頭宮殿鎖千門細柳新蒲為誰
綠憶昔霓旌下南苑苑中萬物生顏色昭陽殿裏第一
人同輦隨君侍君側輦前才人帶弓箭白馬嚼齧黃金

勒翻身向天仰射雲一箭正墮雙飛翼明眸皓齒今何
在血污遊魂歸不得清渭東流劒閣深去住彼此無消
息人生有情淚沾臆江水江花豈終極黃昏胡騎塵滿
城欲往城南忘城北 又過故斛斯校書莊詩曰此老
已云沒鄰人嗟未休豈無宣室召徒有茂陵求妻子寄
他食林園非昔遊堂空總帷在淅淅野風秋 李白謝
公宅詩曰青山日將暝寂寞謝公宅竹裏無人聲池中
有虛白荒庭衰草遍廢井蒼苔積惟有清風閒時時起

泉石 元結去鄉悲詩曰踟躕古塞關悲歌為誰長日

行見孤老羸弱相提將聞其呼怨聲聞聲問其方乃言
無患苦豈棄父母鄉非不見其心仁惠誠所望念之何
可說獨立為悽傷 劉長卿過賈誼宅詩曰三年謫宦

此棲遲萬古惟留楚國悲秋草獨尋人去後寒林空見
日斜時漢文有道恩猶薄湘水無情弔豈知寂寞江山
搖落處憐君何事到天涯 李嘉祐傷歙州陳二使君
詩曰憐君辭病卧滄州一旦云亡萬事休慈母斷腸妻

獨泣寒雲慘色水空流江村故老長懷惠山路孤猿亦
共愁寂寞荒墳近漁浦野煙朝暮即千秋 皇甫曾傷

陸處士詩曰從此無期見柴門對雪開二毛逢世難萬
恨掩泉臺返照空堂夕孤城弔客迴漢家偏訪道猶畏
鶴書來 顧況傷大理謝少卿詩曰舊館絕逢迎新詩

何處呈空留封禪草已作岱宗行柳蠹風吹折階崩雪
遶平無因重來此剝哭兩三聲 又傷子詩曰老夫喪
愛子日暮千行血聲逐斷猿悲路隨飛鳥滅老夫已七

十不作多時別 司空曙觀王右丞遺文詩曰舊日相

知盡深居獨一身閉門空有雪看竹永無人每許前山

隱曾憐陋巷貧題詩今尚在暫為拂留塵 李益惜春

傷詩曰畏老身今老逢春解惜春今年看花伴已少去

年人 權德輿過亡友楊校書舊廳詩曰故人隨化往

倏忽今六霜及我就拘限清風留此堂松竹愈映鬱芝

蘭自銷亡絕絃罷流水聞笛同山陽朗如冰玉姿粲若

鸞鳳章欲翬推勁翮先秋落貞芳正平賦鸚鵡文考頌

靈光二子古不弔夫君今何傷黃墟既杳杳元化亦茫茫
豈必恨宿草含淚灑衣裳 衛象傷李端詩曰才子

浮生促泉臺此路賒官卑揚執戟年少賈長沙人去門
棲鳥災成酒誤蛇唯餘封禪草留在茂陵家 元稹傷

呂衡州詩曰鵬鶚生難敵沈檀死更香兒童喧巷市羸
老哭碑堂雁起沙汀暗雲連海氣黃祝融峯上月幾照

北人喪 劉禹錫傷獨孤舍人詩曰昔別公年少今悲
喪國華遠來同社鶯不見早梅花 又傷循州渾尚書

詩曰貴人淪落路人哀碧水連天丹旆迴遙想長安此

時節朱門深巷百花開又重至衡陽傷柳儀曹詩曰

憶昨與故人湘江岸頭別我馬映林嘶君帆轉山滅馬

嘶循故道帆滅如流電千里江離春故人今不見又

謫居悼往詩曰悵悵何悵悵長沙地卑濕樓上見春多

花前恨風急猿愁腸斷叫鶴病翹趾立牛衣獨自眠誰

哀仲卿泣又遙傷丘中丞詩曰鄴下殺才子蒼茫怨

氣凝枯楊映漳水野火上西陵馬鬣今無所龍門昔共

登何人為弔客唯是有青蠅 孟郊弔李元賓遺字詩

曰零落四五字忽然千萬年那知真寂客不有補遺篇
斜月吐空壁旅人難獨眠一生能幾時萬慮來相煎戚
戚故交淚幽幽長夜泉已矣難重言一言一潸然 又

悼幼子詩曰一閉黃蒿門不聞白日事生氣散成風枯
形化為地負我千年恩欠爾千行淚灑之北原上豈待
秋風至 王建弔孟東野詩曰哭盡秋天月不明蘭無
香氣鶴無聲自從東野先生死側近雲山得散行 白

居易題于家公主舊宅詩曰平陽舊宅少人遊應是遊

人到即愁布穀鳥啼桃李院絡絲蟲怨鳳凰樓臺傾滑

石猶殘砌簾動真珠不滿鉤聞道至今蕭史在鬢鬚雪

白向韶州 朱慶餘廢宅詩曰古巷棘門誰舊宅早曾

聞說屬官家更無新燕來巢屋唯有閒人去看花荒廢

欲摧塵滿榭小池初涸草侵沙榮華事歇多如此立馬

踟躕對日斜 于武陵過侯王故第詩曰過此一酸辛

行人淚有痕獨殘新碧樹猶擁舊朱門歌歇雲初散簷

空燕尚存不知彈缺客何處感新恩 許渾題江令公

舊宅詩曰身沒南朝宅已荒邑人猶賞舊風光芹根生
葉石池淺桐樹落花春井香帶暖山蜂巢畫閣欲陰溪
燕集書堂閒愁此地更南望潮滿臺城春草長 又傷

湖州李郎中詩曰政成身沒共興哀鄉路兵戈旅櫬迴
城上暮雲凝鼓角海邊春草閉池臺經年未葬佳人散
昨日因齋故吏來南北相逢皆掩淚白蘋洲上一花開
殷陶經杜甫舊宅詩曰浣花溪裏花多處為憶先生

在蜀時萬古只應留舊宅千金無復換新詩沙崩水檻
鷗飛盡樹壓村橋馬過遲山月不知人事變夜來江上
與誰期 李商隱過伊僕射舊宅詩曰朱邸方酌力戰
功華筵俄歎逝波窮迴廊簾斷燕飛出小閣塵凝人語
空幽砌欲乾殘菊露餘香猶入敗荷風何能更涉龍江
去獨立寒沙弔楚宮 溫庭筠開元中錫宴堂樓臺遺
趾詩曰茲地乃蔓草故墓摧壞牆枯池接斷岸唧唧啼
寒螿敗荷塌作泥死竹森如槍遊人問老吏相對聊感

傷 又和王秀才傷歌妓詩曰月缺花殘莫愴然花須
終發月終圓更能何事消芳念亦有濃華委逝川一曲
艷歌留宛轉九原春草葬嬋娟王孫莫學多情客自古
多情損少年 又過賀監舊宅詩曰越溪漁客賀知章
任達憐才愛酒狂鸚鵡葦花隨釣艇蛤蜊菰葉夢橫塘
幾年涼月拘華省一宿秋風憶故鄉榮路脫身終自得
福庭回首莫相忘出羣鸞鶴辭遼海落筆龍蛇滿壞牆
李白死來無醉客可憐神彩弔殘陽 又宿亡友李處

士故墅詩曰柳不成絲草帶煙海槎東去鶴歸天愁腸

斷處風何限病眼開時月正圓花若有情還悵望水因

無事莫潺湲終知此恨難消遣辜負南華第二篇 方

干經陸補闕故居詩曰不敢要君徵亦起致君全得似

唐虞謹言昨歎離天聽新塚今聞入縣圖琴鎖壞窓風

自觸鶴歸喬木月難呼學詩弟子人何在檢點猶逢諫

草無 又題故人廢宅詩曰寒莎野樹入荒庭風雨蕭

蕭不掩扃舊徑已知無孟竹前溪應不浸荀星精靈消

散歸寥廓功業傳留在誌銘薄暮停車更悽愴山陽鄰

笛若為聽 又廢宅詩曰主人何處獨徘徊流水自流

花自開若見故交皆散去即應新燕不歸來入門繚繞

穿荒竹坐石逡巡染綠苔應是曾經惡風雨修桐半折

損琴材 又經故侯郎中舊居詩曰一朝寂寂與冥冥

壟樹未長墳草青高節雄才向何處夜闌空鑱滿池星

趙嘏經王先生故居詩曰晚波東去海茫茫誰識蓬

山不死鄉美玉已歸蕭史去碧樓紅樹倚斜陽 又悼

亡詩曰一燭從風到奈何三年衾枕逐風波雖知不得

公然淚時泣闌干恨更多一明月蕭蕭海上風君歸泉

路我飄蓬門前雖有如花貌爭奈如花心不同二李羣

玉傷思詩曰八月白露濃芙蓉抱香死紅枯金粉墮寥

落寒塘水西風團葉下疊穀參差起不見棹歌人空垂

綠房子又傷友詩曰玉棺來九天鳬鳥掩窮泉蕪沒

池塘興淒涼翰墨筵短期存大夢舊好委浮烟我有幽

蘭曲因君遂絕絃又傷幼女痴兒詩曰哭爾春日短

支頤長歎嗟不如半死樹猶吐一枝花 周繇經故宅

有感詩曰身沒南荒雨露賒朱門空鎖舊繁華池塘鑿
就方通水桃杏栽成未見花異代圖書藏幾篋傾城羅
綺散誰家昔年埏埴生靈地今日生人為歎嗟 皮日
休哀隴民詩曰隴山千萬仞鸚鵡巢其巔窮危又極嶮
其山猶不全蚩蚩隴之民懸度如登天空中覘其巢衆
羽爭紛然百禽不得一十人九死焉隴川有成卒戍卒
亦不閒將命提雕籠直到金臺前彼毛不自珍彼舌不

自言胡為輕人命奉此玩好端吾聞古聖王珍禽皆舍
旃今此隴民屬無歲啼連連又襄州漢陽王故宅詩

曰碑字依稀廟已荒猶聞耆舊憶賢王園林一半為他
主山水虛言是故鄉戟戶野蒿生翠瓦舞樓棲鴿汙雕
梁柱天功業緣何事不得終身似霍光杜荀鶴經廢

宅詩曰人生富貴盛修德可延之不慮有今日爭教無
破時蘇斑題字壁花發帶巢枝何況高原上荒墳與折
碑張祐感王將軍柘枝妓沒詩曰寂寞春風舊柘枝

美人休舞曲停吹鴛鴦鈿帶拋何處孔雀羅衫付阿誰
畫鼓不聞招節拍錦靴虛想挫腰支今年座上翻如醉
曾見梨園教徹時 皇甫冉傷美人詩曰玉佩石榴裙
當年嫁使君專房獨見寵傾國衆皆聞歌舞長無對幽
明忽此分陽臺千萬里何處作行雲 李羣玉悼笙妓
詩曰麗質仙姿烟逐鳳凰聲斷吹樓空多情草色怨
還綠無主杏花春自紅墮珥尚存芳樹下餘香漸滅玉
堂中唯應去抱雲和管從此長歸阿母宮 韋莊悼亡

姬詩曰鳳去鸞歸不可尋十洲仙路彩雲深若無少女
花應老為有姮娥月易沈竹葉豈能消積恨丁香空解
結同心湘江水濶蒼梧遠何處相思弄舜琴一默默無
言惻惻悲閒吟獨傍菊花籬只今已作經年別此後知
為幾歲期開窗每尋遺念物倚樓空綴悼亡詩夜來孤
枕空腸斷窓月斜輝夢覺時二六七年來春又秋也同
歡笑也同愁纔聞及第心先喜試說求婚淚便流幾為
妬來頻斂黛每思閒事不梳頭如今悔恨將何益腸斷

千休與萬休

三

一閑香閨後羅衣盡施僧鼠偷筵上果

蛾撲帳前燈土蝕釵無鳳塵生鏡少菱有時還影響花

葉曳香繒

四

芳草又芳草故人楊子家青雲容易散白

日等閒斜皓質留殘雪香魂逐斷霞不知何處笛一夜

叫梅花

五

張喬經費徵君故居詩曰草堂蕪沒後來往

問樵翁斷石荒林外孤墳晚照中數溪分大野九子立

寒空烟壁曾行處青雲路不通

曹松弔建州李員外

詩曰銘旌歸故里猿鳥亦悽然已葬桐江月空迴建水

船客傳為郡日僧說讀書年恐有吟魂在深山古木邊

羅隱經故翰林張舍人所居詩曰行塵不是昔時塵

謾向朱門憶侍臣一榻已無開眼處九泉應有愛才人

文餘吐鳳當年詔樹想棲鸞舊日春從此深恩更難報

夕陽衰草獨沾巾又瓊華觀經故友所居詩曰槐花

漠漠向人黃此地追遊跡已荒清論不知蒙叟達死交

空歎趙岐亡病來未忍言間事老去惟應覓醉鄉日暮

街東策羸馬一聲橫笛似山陽又清溪江令公宅詩

曰鸞牋象管夜深時曾賦陳宮第一詩讌罷風流人不

見廢來蹤跡草應知鶯憐勝事啼空谷蜨戀餘香舞好

枝還有往年金甃井牧童樵叟等閒窺 宋寇準晚坐

有感詩曰出門望寒野四顧惟椒坡憶昔楚大夫還此

情如何殘陽半明滅水落西風多因同下蔡恨不覺增

悲歌 歐陽修感興詩曰唧唧復唧唧夜歎曉未息蟲

聲急愈炎病耳聞若刺壯士易為老良時難再得日月

相隨東天行自南北三者不相謀萬古無窮極安知人

世間歲月忽已易

李觀衰老婦詩曰里中一老婦行

行啼路隅自悼未亡人暮年從二夫寡時十八九嫁時

六十餘昔日遺腹兒今茲垂白鬚子豈不欲養母豈不

願居徭役及下戶財盡無所輸異籍幸可免嫁母乃良

圖牽車送出門急如盜賊驅兒孫孫有婦小大攀且呼

回頭與永訣得死無刑誅我時聞此言為之長歎吁天

民固有窮鰥寡實其徒吾君務復古旦旦師黃虞赦書

褒節婦許與旌門閭州縣莫能察詔旨徒成虛又感

秋詩曰徙倚重咨嗟非緣惜歲華關山異鄉客砧杵別
人家天冷雲含日溪清水現沙屈魂終不返悲思更無
涯 宋祁長安道中悵然作曰三輔古風烟征驂悵未
前山園蓬顆外宮室黍離邊樹老經唐日碑殘刻漢年
便須真隕涕不待雍門絃一興亡作今古事往始堪悲
宮破黃山在城空北斗移走崗寒兔隱啼樹暮鴉飢潮
岸重回首唯餘王粲詩二梅堯臣秋夜感懷詩曰風葉
相追逐庭響如人行獨宿不成寐起坐心屏營哀哉齊

體人魂氣今何征曾不如隕籜繞樹猶有聲涕淚不能
止月落荒雞鳴 又悼亡詩曰每出身如夢逢人強意

多歸來仍寂寞欲語向誰何窓冷孤螢入宵長一雁過
世間無最苦精爽此銷磨 韓維弔杜少陵墓詩曰三
尺孤墳在空留萬古名風騷誰是主天地大無情入夜
月虛白逢春草自生耒陽江色迴憑弔恨難平 徐積

哀哀詞曰哀哀復哀哀哀哀至此極孤兒與慈母中路
忽相失恍惚須臾間終日不復得誰復坐我堂誰復入

我室誰復飲兒酒誰復哺兒食兒飢復誰念兒寒復誰
恤耳不聞慈語目不見慈色譬如行路人日遠如一日
行人猶可期遠道猶可追天窮地盡處一日猶可歸哀
哀復哀哀此去無盡時誰言生離別不如死別離君不
見人已閉門鳥已棲黃昏塚畔孤兒啼 張耒京師廢
宅詩曰當道朱門白晝扃高堂歌吹久無聲古窓積雨
昏殘畫朽樹輕陰長寄生門下老人時灑掃舊時來客
歎平生艷姬驕馬知何處獨有庭花春自榮 歐陽澈

秋試下第有感詩曰籬菊金英噴異香杜門岑絕獨持觴風掀脫葉橫斜舞雲襯平林淺淡黃塞管有情增哽咽野花無緒伴淒涼不禁景物撩秋眼剩與新篇付錦囊嚴羽悠悠我行邁詩曰悠悠我行邁邈在天一方道路無終極時節易炎涼路逢故里親揮泣問我鄉妻子別離久不知今存亡中原多白骨城邑聚豺狼遠去無僮僕思還絕餽糧寄語家中人遠行良可傷文天祥建康詩曰金陵古會府南渡舊陪京山勢猶盤礴江

流已變更健兒徙幽土新鬼哭臺城一片清溪月偏于
客有情 丁開建業詩曰誰遣淒涼滿眼中黃花渺渺
又秋風龍蹲虎踞江山大馬去牛來社稷空縱有千人
唯諾諾本無百歲更匆匆乾坤顛倒孤身在聊復殘生
伴釣翁 金秦畧悼亡詩曰自古生離足感傷爭教死
別便相忘荒陂何處墳三尺老眼他鄉淚數行多事春
風吹夢散無情寒月照更長還家却是清明節忍見堂
空紙挂牆 元元好問哀王仲澤詩曰太學聲華弱冠

馳青雲岐路九霄飛上前論事龍顏喜幕下籌邊犬吠
稀壯志相如頭碎柱赤心嵇紹血沾衣從來聖牘褒忠
義誰為幽魂一發揮 許衡有感詩曰嬌兒未成人病
苦不肯已憂傷動中懷慘慘心欲碎老妻情已惡中夜
泣相對何如早還鄉山陽墳隴在平生所願心展轉不
得遂十年誤同遊回首只多愧病連肝肺深愁覺妻子
累悠悠故鄉情滴滴眼中淚 馬祖常悼亡詩曰燕子
樓空花不開繡簾天晚月初來手痕留在紅牙板猶有

餘香妬落梅

朱廷珪悲徐州詩曰彭城八月風塵起

數郡義兵多戰死良家子女復何辜盡作黃河中鬼
髑髏填海幾時歸千古沈寃無處洗王師一日天上來
賊船夜斫浮橋開守橋將軍不敢敵狂浪倒瀉聲如雷
三山回望平如掌野曠猶聞金鼓響軍中少年當封侯
爭入轅門請功賞江邊老翁死即休血淚沾巾空白頭
王冕悼王止齋詩曰三月燕山聽子規追思令我淚
垂垂雖然事業能經世可惜衣冠在此時霜慘晴窓琴

獨冷月明秋壁劍雙悲山河萬里人情別回首春風說

向誰 伯顏子中過故居詩曰白頭歸故里荒草沒柴

門鄉舊仍相見兒童誰復存忠清千古事骨肉一家魂

痛哭松楸下雲愁月欲昏 明劉基悲杭城詩曰觀音

渡頭天狗落北關門外塵沙惡健兒被髮走如風女哭

男啼撼城郭憶昔江南十五州錢塘富庶稱第一高門

畫戟擁雄藩艷舞清歌樂終日割臙進酒皆俊郎呵叱

間人氣驕逸一朝奔迸各西東玉斚金杯散蓬華清都

太微天聽高虎畧龍韜緘石室長夜風吹血腥入吳山
浙河慘蕭瑟城上陣雲凝不飛獨客無聲淚交臆 王

冕傷亭戶詩曰清晨度東關薄暮曹娥宿草牀未成眠
忽起西隣哭敲門問野老謂是鹽亭族大兒去采薪投
身歸虎腹小兒出起土衝惡入鬼錄課額日以增官吏
日以酷不為公所幹惟務私所欲田園供給盡醯數屢
不足前夜總催罵昨日塲胥督今朝分運來鞭笞更殘
毒竈下無尺草甕中無粒粟旦夕不可度久世亦何福

夜永聲語冷幽咽向古木天明風啓門僵屍掛荒屋

又悲苦行詩曰悲風吹茅墮空屋老鳥號鳴屋上木誰

家男子從遠征父母妻孥相送哭哭聲鳴咽已別離道

旁復對行人悲去者一身事歸者百感隨前年鬻大女

去年賣小兒皆因官稅迫非以飢所為布衣磨盡草衣

拆一冬幸喜無霜雪今年老小不成羣賦稅未知何所

出昨夜忽驚雷破山比來暴雨如飛湍此時江南正六

月酸風入骨生苦寒東村西村無火色凝雲著地如墨

黑蹟翁瞽嫗相喚忙屋漏牀牀眠不得開門不敢大聲
語門外磨牙多猛虎自來住此十世餘古老未嘗罹此
苦我感此情重歎吁不覺淚下沾巾裾安得壯士挽天
河一洗煩鬱清九區坐令爾輩皆安居 張憲銅雀妓

詩曰陵樹日沈西秋風石馬嘶芳樽傾總帳詎肯濕黃
泥慘慘笙歌合遙遙望眼迷玉人腕如草能得幾回啼
魏澤過侯城里有感詩曰筍輿衝雨過侯城撫景依
然感慨生黃鳥向人空百轉清猿墮淚又三聲山中自

可全高節天下難居是盛名却憶令威千載後重歸華
表不勝情 曾榮過劉伶宅詩曰舊宅無人住荒墟有
路岐一生渾是醉萬古復何悲白首銜杯處青山荷鋤
時最憐獨醒者高塚亦累累 羅以明感興詩曰勛業

飄零梅子真江山誰與訪遺塵艱難獨不悲前事慷慨
徒勞憶故人太乙圖書元在漢東周禾黍半歸秦晴天
玉筍秋風上欲薦蘋花淚滿巾 王偁過舊遊有感詩

曰濕雲如醉護輕塵黃蛺蝶東風滿四鄰新綠只疑銷晚

黛落紅猶記掩歌唇舞樓春去空殘日月榭香飄不見
人欲覓梨雲仙夢遠坐令芳沼獨傷神 郭登哀征人

詩曰天迷離水鳴咽戰馬無聲寶刀折冤鬼悽酸啼夜
月青燐熒熒明又滅照見征夫戰時血 張和悼妾詩

曰桃葉歌殘思不勝西風吹淚落紅冰樂天老去風情
減子野歸來感慨增花逐水流春不管雨隨雲散夢難
憑宵來書館寒威重誰送薰香半臂綾 吳寬悼董孟

珍詩曰獨持古道作今人白首我冠稱隱淪垂老不堪

三月病移家空是一生貧篋中書帙悲遺墨窓底碁枰

積素塵深巷東風花自落扣門無復過西鄰 沈周廢

宅行曰長洲苑外連雲宅青粉垣牆高廿尺重樓沓閣

出參差柳絮中間影朱碧堂前暖霞封畫欄淵淵伐鼓

催牡丹行人隔牆空歎息富貴無緣容眼看主人只怕

客不醉白日未昏教火繼歌童揭調塵隨梁舞女失釵

金溜地豪華忌久復忌盈時革人亡一夢驚門前車馬

野花盡地上牛羊無草生老奴髮禿變雙足猶戀遺基

葺茅屋半甌薺粥不療飢西風滿面吞聲哭
顧璘傷

歌行曰青春欲去不可留白日欲落花含愁銀鞍白馬
分明別故苑芙蓉傷素秋不惜紅顏坐凋歇可憐君恩
難再得夜簾香消巫峽雲寒衣淚落秦關雪掩却青銅
鏡不忍生塵埃且留蘭膏燭有心莫成灰風吹蓬枝往
復回去年團扇今年開小物無情尚如此何獨君恩無
去來買賦無黃金挑絲不成錦欲因魂夢逐車輪願君
莫惡珊瑚枕

原賦後漢蘇順歎懷賦曰悲終風之墮籜條枝梢以摧
傷桂敷榮而方盛遭暮冬之隆霜華菲菲之將實中天
零而消亡童烏濬其明摅悲何壽之不長嗟劉生之若
茲奄彌留而永喪 魏王粲傷天賦曰惟皇天之賦命
實浩蕩而不均或老終以長世或昏夭而夙泯物雖存
而人亡心惆悵而長慕哀皇天之不惠抱此哀而何懇
求魂神之形影羌幽冥而弗逆淹徘徊以想像心彌結
而紆縈晝忽忽其若昏夜炯炯而至明 晉陸機歎逝

賦曰昔每聞長者追計平生同時親故或共遊一途同
宴一室十年之內索然已盡以是思哀哀可知矣賦曰
悲夫川閱水以成川水滔滔而日度世閱人而為世人
冉冉而行暮人何世而弗新世何人之能故亮造化之
若茲吾安取夫久長痛靈根之夙隕怨具爾之多喪悼
堂構之隕瘁愍城闕之丘荒親彌懿其已逝交何戚而
不亡彌年時之詎幾夫何往而不殘或冥邈而既盡或
寥廓而僅半信松茂而柏悅嗟芝焚而蕙歎苟性命之

弗殊豈同波而異瀾年彌往而念廣塗薄暮而迫迤顧

舊要于遺存得十一于千百又愍思賦曰予屢抱孔

懷之痛而奄復喪同生姊銜恤哀傷一載之間而喪制

便過故作此賦以紓慘惻之感時方至其儵忽歲既去

其晚晚樂來日之可繼傷頽年之莫纂覽萬物以澄念

怨伯姊之已遠尋遺塵而思長瞻日月之何短升降兮

階際顧盼兮屏營雲承宇兮藹藹風入室兮泠泠僕從

為我悲孤鳥為我鳴鈕滔母孫氏悼艱賦曰伊稟命

之不辰遭天難之靡忱夙無父之何怙哀壅瘁以抽心
覽蓼莪之遺詠詠肥泉之餘音經四位之代謝雖積祀
而思深伊三從而有歸爰奉嬪于他族仰慈姑之惠和
荷仁澤之陶渥釋褰服以斬衣代羅幃以縞布仰慈尊
以飲泣撫孤景以協慕遇飛廉之暴骸觸驚風之所會
扶搖奮而上躋頽雲下而無際頓余邑之當春望峻陵
而鬱青瞻空宇之寥廓愍宿草之發生顧南枝以永哀
向北風以飲泣情無觸而不悲思無感而不集 宋謝

靈運感時賦曰夫逝物之感有生所同頽年致悲時懼
其速豈能忘懷乃作斯賦相物類以迨已閱交臂之匪
賒揆大耋之或邁指崦嵫于西河鑒三命于予躬怛行
年之蹉跎于鷦鷯之先號挹芬芳而夙過微靈芝之頻
秀迫朝露其如何雖發歎之早晏諒大暮之同科 又
傷已賦曰嗟夫卞賞珍于連城孫別駿于千里彼珍駿
以貽愛此陋容其敢擬丁曠代之渥惠遭謬眷于君子
眺徂歲之驟經覩芳春之每始始春芳而羨物終歲徂

而感已貌憔悴以哀形意幽翳而苦心出衾裯而載坐
闢檐幌以迥臨望步檐而周流眺幽閨之清陰想輕綦
之往跡餐和聲之餘音播芬煙而不燠張明鏡而不照
歌白華而絕曲奏蒲生之促調 顏延之行殫賦曰嗟
我來之云遠覩行殫于水隅崩朽棺以掩壙仰枯顙而
枕衢資沙礫以含實藉水草之襪儲撫躬中塗太息蘭
渚行徘徊于永路時悄愴于川侶 鮑昭傷逝賦曰晨
登南山望美中河露團秋槿風卷寒蘿悽愴傷心悲如

之何盡若窮煙離若箭弦如影滅地猶星墮天棄華宇

于明世閉金局于下泉循堂廡而下降歷幃戶而升基

志存業而遺緒身先物而長辭日月飄而不留命倏忽

而誰保髮迎憂而送華貌先悴而收藻 梁蕭子範傷

往賦曰彼蘭菊之芳茂及蕖槿之榮色終於邑乎繁霜

俱飄飄于路側引輕華之微珍猶見嗟于有識况獨立

之妍媛信盈盈而挺植去倡家而來儀承君子之宴息

催麗容而思進豈蛾眉之肯抑咏美媵而自箴歌忠妾

而為式痛妖姿之不留惜華年之中天冀羣祥之永慶
忽從颺而先標魂一逝而莫追夕有長而無曉惟君侯
之惆悵覽遺物而霑巾帷半垂而將下尚彷彿而疑真
懷方士之良術顯有憑而致神 周庾信哀江南賦曰

粵以戊辰之年建亥之月大盜移國金陵瓦解信年二
毛即逢喪亂狼狽流離至于暮齒燕歌遠別悲不自勝
楚老相逢泣將何及鍾儀君子入就南冠之囚季孫行
人留守西河之館申包胥之頓地碎之以首蔡威公之

淚盡加之以血孫策以天下為三分衆纔一旅項羽用
江東之子弟人唯八千遂乃分裂山河宰割天下豈有
百萬義師一朝卷甲芟夷斬伐如草木焉江淮無涯岸
之阻亭壁無藩籬之固將非江表王氣應終于三百年
乎嗚呼山岳崩頽既履危亡之運春秋迭代必有去故
之悲天意人事可以悽愴傷心者矣賦曰始則王子召
戎姦臣介冑既官政而離遏遂師言而泄漏爾乃傑黠
構扇憑陵畿甸青袍如草白馬如練天子履端廢朝單

于長圍高宴竟遭夏臺之禍遂覩堯城之變遂乃韓分
趙裂鼓卧旗折失羣班馬迷輪亂轍猛士嬰城謀臣卷
舌昆陽之戰象走林常山之陣蛇奔穴五郡則兄弟相
悲三州則父子離別于是桂林顛覆長洲麋鹿潰潰沸
騰茫茫塤黷競動天關爭迴地軸探雀穀而未飽待熊
蹯而詎熟乃有車側郭門筋懸廟屋鬼同曹社之謀人
有秦庭之哭西瞻博望北臨玄圃月榭風臺池平樹古
仁壽之鏡徒懸茂陵之書空聚中宗之夷凶靖亂大雪

冤耻去代邸而承基遷唐郊而纂祀反舊章于司隸歸
餘風于正始沈猜則方逞其欲藏疾則自矜于已天下
之事沒焉諸侯之心搖矣既而齊交北絕秦患西起況
背關而懷楚冀端委而開吳驅綠林之散卒拒驪山之
叛徒問諸淫昏之鬼求諸厭劾之巫荆門遭廩延之戮
夏口濫達泉之誅況以沴氣朝浮妖精夜殞赤鳥則三
朝夾日蒼雲則七重圍軫亡吳之歲既窮入郢之年斯
盡周含鄭怒楚結秦冤有南風之不競值西鄰之責言

俄而梯衝亂舞冀馬雲屯伐秦車于暢轂沓漢鼓于雷
門雖復楚有七澤人稱三戶辭洞庭兮木落去涪陽兮
極浦熾火兮焚旗貞風兮害蠱乃使玉軸揚灰龍文折
柱下江餘城長林故營徒思拊馬之秣未見燒牛之兵
章曼支以轂走宮之奇以族行河無冰而馬渡關未曉
而雞鳴忠臣解骨君子吞聲章華望祭之所雲夢偽遊
之地荒谷縊于莫敖治甫囚乎羣帥研笱拉鷹鷂批
攢于時瓦解冰泮風飛電散渾然千里溜澠一亂雪暗

如沙冰橫似岸逢赴洛之陸機見離家之王粲莫不聞

隴水而掩泣向關山而長歎 增唐蕭穎士登臨河城

賦曰亡舅孝廉元君才高位下一命屈臨河尉尋遭風

瘵有加無瘳憂悵迄逾一紀故不復仕舅于予有教授

之恩隻詞片字皆資訓誘天寶元年秋八月奉使求遺

書于人間越來月局于臨河之舊邑覽物增懷泣然有

賦詞曰登孤城兮見河水之漫漫城有隍兮水瀾歎翻

覆兮無端俯崇墉兮心酸心斷絕兮河水之干惟佩觿

之弱歲荷哲舅之矜憐備潤身之黼藻聞染翰之蹄筌
豈期文嗣作者價參時賢匪舅德其焉爾諒師資乎在
焉痛才高而位下悲道悠而運促甫一命于並城蹇無
媒兮窘束僚屬颺而墜羽凌永路而傾軸昔自公而暇
豫陪作賦于茲樓懷一紀以如昨慘今晨而獨遊俯蕭
條之邑里對零落之徂秋舊館悽其在目長川逝而不
留徒臨風而揮涕孰知夫四望而可以銷憂者哉 却
昂驪山傷古賦曰嗚呼驪山之隧其庸幾年上周五里

下錮三泉罄珠璣之布獲盡金石之雕鐫匠人勞而不
償反生理于鬼埏狐兔穴而塵積牧豎焚而火連嗟拔
山之壯氣成拱木之寒烟百二之襟帶莫守數仞之丘
墳巍然何德之哀絕伯翳之餘業何力之競為劉炎之
著鞭 梁肅過舊園賦并序曰余行年十八歲當上元
辛丑盜入洛陽因竄身東下旅于吳越轉徙阨難之中
者垂二十年上嗣位歲應詔詣京師其年夏除東宮校
書郎遂請告歸覲于江南八月過嶠澠次于新安東南

十數里舊居在焉時歲滋遠荆榛蕪翳喬木蒼然三徑
莫辨訪鄰老而已盡盼庭柯以霑衣情之所鍾可勝歎
邪詞曰白露既戒夫清秋爰駕言而東邁漫征路之悠
悠旦予發乎新安歷函關之舊丘灌叢森以相屬披一
徑而可求問里巷之罕人辨原田而莫由堂除既缺衡
宇亦折樹蔽戶而稍稍水衡隄而活活駭獸羣起頽墉
四達識舊井于庭隅弔重蘿于木末既循省而顧慕愈
辛酸而慘怛 劉禹錫傷往賦曰人之所以取貴于飛

走者情而誕者以遺情為智豈至言邪予授室九年而
鰥痛苦人之天閱弗遂也作賦以傷之冀夫覽者有以
增伉儷之重云我行其野農民桑者舉案來饁亦在林
下我觀于途裨販之夫同荷均挈荆釵布襦物莫失儷
以孤處我方踽踽而馬如我復虛室目淒涼兮心伊鬱
心伊鬱兮將語誰坐匡牀兮撫嬰兒指遺桂兮能忍慙
空帷兮欲歸我入寢宮痛人亡兮物改其容寶瑟僵兮
絃柱絕瑤臺傾兮錦奩空寒爐委灰虛幌多風閱刀尺

之餘澤見巾箱之故封想翩翻于是非求憲宰于冥蒙
信竒術之可致嗟此生今不逢還抱影以獨出乃百哀
而攻中 又三良塚賦曰魯文六年秦伯任好卒以子
車氏之三子為殉皆秦之良也國人哀之為之賦黃鳥
秋季月吾西遊汧渭出于岐雍之間于古道傍得三良
塚心甚哀之詞曰宛其三子遭時述遭主已即世身皆
靡全指冥茫而為期撫昭世而坐捐方惴惴以臨穴且
哀哀而號天上刺哀德下傷幽魂挂驂壠樹脫劒山門

掇野芳以為薦汲行潦而充罇矧今情之猶悲諒古恨
之潛吞 李德裕項王亭賦曰登彼高原徘徊始曙尚
識艤舟之岸焉知繫馬之樹望牛渚而蒼然歎烏江之
舊渡想山川之未改嗟人世之何遽思項氏之入關按
秦圖而割據恃八千之剽疾棄百二之險固咸陽不留
王業已去嗟乎楚聲既合漢圍已布歌數闋而甚悲酒
盈罇而不御當其盛也天下侯伯自我而宰制及其衰
也帳中美人寄命而無處


原書晉劉臻妻陳氏荅舅母書曰元方春秋始富德業
亦隆弘道博文才質兼備冀志與時暢榮耀當年豈意
一朝冥然長往元方沖幼過庭莫聞聖善明訓業成三
徙亦既冠婚雙譽允集庶幾偕老色養膝下而殃厲橫
流艱禍仍遘媛姊傾逝宗模永絕姊方元華年並天戚
豈慮豈圖禍降彌酷良才夭闕始立崇基殞于一簣仰
痛殄滅俯悼二弟斯人斯命當可奈何母年踰耳順備
經百罹一紀之中四遭至痛目前廓然三從靡託窮悼

中發情馳難處

御定淵鑑類函卷二百六十四

謹案第一頁後一行秦川記曰刊本秦訛秦據唐
類函改

第二頁前二行而伐我同姓刊本伐訛滅據左傳
改



總校官庶吉士 臣 張能照

校對官檢討 臣 龔大萬

謄錄監生 臣 杜 成

欽定四庫全書薈要

子部

御定淵鑑類函卷二百六十五

欽定四庫全書薈要卷一萬一千七百十三

子部

御定淵鑑類函卷二百六十五

人部二十四

怨

愁

恐懼 喜

怨一

原左傳曰子產云我聞忠善以損怨不聞作威以防怨

又曰君子之言信而有徵故怨遠于身小人之言僭而無徵故怨咎及之 增國語曰夫事君者勞而不懟怨而不怒 原春秋潭潛巴曰河水逆流怨氣盛也

管子曰凡禍亂之所生生于怨咎怨咎之所生生于非
理故曰閉禍在除怨 增文子曰人有三怨爵高者人
妬之官大者王惡之祿厚者怨處之夫爵益高者意益
下官益大者心益小祿益厚者意益薄 楚辭曰怨靈
脩之浩蕩終不察夫民心

怨二

原詩序曰角弓父兄刺幽王也不親九族而好讒佞骨
肉相怨故作是詩也 增禮表記曰虞夏之道寡怨于

民 左傳曰宋華元將與楚戰殺羊食士其御羊斟不
與及戰曰疇昔之羊子為政今日之事我為政與入鄭
師故敗君子謂羊斟非人也以其私恨敗國殄民 原
又曰晉侯賞從亡者介之推不言祿祿亦弗及其母曰
盍亦求之以死誰懟對曰尤而效之罪又甚焉且出怨
言不食其祿 增又曰季郈之雞鬪季平子
郈昭伯季氏介其
雞郈氏為之金距平子怒益宮于郈氏且讓之故昭伯
怨平子 原又曰晉郤至獻楚捷于周與單襄公語驟

稱其伐單子語諸大夫曰溫季其亡乎位于七人之下而求掩其上怨之聚亂之本也多怨而階亂何以在位夏書曰怨豈在明不見是圖將慎其細也今而明之其可乎 增又曰魯平子欲使昭子逐叔孫小小不敢朝昭子命吏謂小曰吾不為怨府 原又曰吳公子札來聘請觀于周樂為之歌周南召南曰美哉始基之矣猶未也然勤而不怨為之歌小雅曰美哉思而不貳怨而不言其周德之衰乎 增晏子春秋曰景公籍重而獄

多拘者滿園怨者滿朝 戰國策曰秦使陳馳誘齊王

建入秦遷之共處之松栢之間餓而死齊人怨建聽姦
人賓客不早與諸侯合從以亡其國歌之云松邪柏邪
住建共者客邪 原淮南子曰和氏之璧夏后之璜揖
讓而進之以合歡夜以投人則為怨時與不時也 增

戰國策曰趙襄子怨智伯漆其頭為飲器 漢書曰汲
黯列九卿而公孫弘張湯為小吏及弘湯稍與黯同位
而尊用過之黯心褊不能無怨望見上言曰陛下用羣

臣如積薪耳後來者居上 晉書曰趙王倫諂事賈后

裴頠甚惡之倫數求官頠與張華固執不許由是深為

倫所怨 又曰晉王衍常詣羊祜陳事辭甚俊辨祜不

然之衍拂衣而起祜顧謂賓客曰王夷甫方以盛名處

大位然敗俗傷化必此人也步闡之役祜以軍法將斬

王戎故戎衍並憾之每言論多毀祜時人為之語曰二

王當國羊公無德 唐書曰李逢吉有恨于裴度李吉

甫故擯李德裕不用及為相誅度使與元稹相怨奪其

宰相而已代之欲引牛僧孺益樹黨乃出德裕為浙西觀察使俄而僧孺入相由是牛李之憾遂成 宋元通

鑑曰安燾與章惇為布衣交惇覲其助已而燾不為之用遂有隙惇用白帖貶謫元祐臣寮燾言于帝帝疑之惇怨益深 又曰初章惇疑曾布在樞府間已使林希為貳以相伺察希日為布所誘且恨惇不引為執政漸有怨隙邢恕承惇意論罷之 又曰鄭居中為鄭貴妃從兄弟歷官通顯始蔡京以星變免官居中語帝復用

京既而怨京不援乃復間京

怨三

增禮著復仇

傳明敵怨

禮記父之讐弗與共戴天兄弟之讐不反兵交遊之讐不

同國

左傳吳駢曰前志有之曰敵惠敵怨不在後嗣忠之道也介人之寵以報私怨非勇也損怨益仇非智

也以私害公非良也

毫髮為瑕

睚眦必報

鮑昭詩毫髮一為瑕丘山不可勝

范睢傳一飯之德必償睚眦之怨必報又晉孫盛曰劉琨王浚睚眦起于絲髮興敗成于丘山

小白

用管寧報射鈞之仇

重耳見披豈念斬祛之怨

史記齊世

家小白奔莒魯使管仲遮莒道射中小白帶鈞小白立是為桓公遺魯書曰召忽管仲仇也請得而甘心醢之

召忽自殺管仲請囚鮑叔牙曰君欲伯王非管夷吾不可于是桓公從之仲及堂阜而脫桎梏厚禮以為大夫
左傳晉重耳奔蒲獻公使寺人披伐蒲重耳踰垣而走披斬其袪及反國披請見文公辭焉披引齊桓公射鈎事以對乃見之

怨四

增五子咸怨

書太康尸位以逸豫滅厥德黎民咸貳乃盤遊無度畋于有洛之表有窮后羿因民

弗忍距于河厥弟五人御其母以從溪于洛之汭五子咸怨述大禹之戒以作歌

構怨

傳桓王失

信諸侯皆叛
構怨連禍

修怨

傳吳子伐陳復修舊怨也曰夫差不修德而修怨也

悲怨

作歌

詩所謂漢竇元狀貌絕異天子使出其妻妻以公主妻怨作書及歌別元云悲哉竇生衣不厭新人

不厭故悲不可忍怨不可去彼獨何人而居斯處時人憐而傳之

孔郝之怨

後漢書孔融郝

慮互相短長以致不睦又曰慮以微法奏免融官因顯明仇怨

怨毒

詩所曰孫皓遷都武昌民汴流

供給咸怨毒焉

舉烟

又曰苻堅之末亂也關中土然無火而烟氣大起方數十里月餘不滅堅每臨

聽令民有怨者舉烟于城北觀而錄之語曰欲得必存當舉烟

怨軍

宋元通鑑遼主自燕至陰涼河

募遼東人為兵使報怨于女真號曰怨軍

怨五

原詩魏阮瑀詩曰民生受天命漂若河中塵雖稱百齡壽孰能應此身猶獲嬰凶禍流離恒苦辛 宋鮑昭行

路難曰君不見河邊草冬時枯死春滿道君不見城上
日今暝沒西山明朝復更出今我何時當得然一去永
滅歸黃泉人生苦多歡樂少意氣敷腴在盛年且願得
志數相就牀頭恒有沽酒錢功名竹帛非我事存亡貴
賤委皇天 又曰瀉水置平地各自東西南北流民生
亦有命安能行歎復坐愁酌酒以自寬舉杯斷絕歌路
難心非木石豈無感吞聲躑躅不敢言 增又曰奉公
金卮之美酒瑇瑁玉匣之雕琴七綵芙蓉之羽帳九華

蒲萄之錦衾紅顏零落歲將暮寒光宛轉時欲沈願君
裁悲且減思聽我抵節行路吟不見柏梁銅雀上寧聞
古時清吹音 又曰洛陽名工鑄為金博山千斲復萬
鏤上刻秦女攜手仙承君清夜之歡娛列置幃裏明燭
前外發龍鱗之丹綵內含麝芬之紫烟如今君心一朝
異對此長歎終百年 又曰璇閨玉墀上椒閣文窓繡
戶垂羅幕中有一人字金蘭被服纖羅采芳藿春燕參
差風散梅開幃對景弄春爵含歌攬涕恒抱愁人生幾

時得為樂寧作野中之雙鳧不願雲間之別鶴 又曰
對案不能食拔劍擊柱長歎息丈夫生世會幾時安能
蹀躞垂羽翼棄置罷官去還家自休息朝出與親辭暮
還在親側弄兒牀前戲看婦機中織自古聖賢盡貧賤
何患我輩孤且直 又曰劉蕖染黃絲黃絲歷亂不可
治我昔與君始相值爾時自謂可君意結帶與君言死
生好惡不相置今朝見我顏色衰意中索寞與先異還
君金釵玳瑁簪不忍見之益愁思 又曰春禽喈喈旦

暮鳴最傷君子憂思情我初辭家從軍僑榮志溢氣干
雲霄流浪漸冉經三齡忽有白髮素髭生今暮臨水拔
已盡明日對鏡復已盈但恐羈死為鬼客客思寄滅生
空精每懷舊鄉野念我舊人多悲聲忽見過客來問我
寧知我家在南城答云我曾居君鄉知君游宦在此城
我行離邑已萬里今方羈役去遠征來時聞君婦閨中
孀居獨宿有貞名亦云朝悲泣閑房又聞暮思淚沾裳
形容憔悴非昔悅蓬鬢衰顏不復妝見此令人有餘悲

但願君懷不暫忘

宋湯惠休怨詩行曰明月照高樓

含君千里光
巷中情思滿
斷絕孤妾腸
悲風盪帷帳
瑤翠坐自傷
妾心依天末
思與浮雲長
嘯歌視秋草
幽葉豈再揚
暮蘭不待歲
離華能幾芳
願作張女引
流悲繞君堂
君堂嚴且秘
絕調徒飛揚
原齊謝朓玉階怨詩
曰夕殿下珠簾
流螢飛復息
長安縫羅衣
思君此何極
增又和王主簿
怨情詩曰掖庭
聘絕國
長門失歡宴
相逢詠靡蕪
辭寵悲團扇
花叢亂數蜨
風簾入雙燕
徒

使春帶賒坐惜紅妝變平生一顧重宿昔千金賤故人

心尚爾故心人不見 原梁元帝送西歸內人詩曰秋

氣蒼茫結孟津復送巫山薦枕神昔時慙慙愁應去今

日勞勞長別人 又豫章王蕭綜聽鐘鳴詩曰歷歷聽

鐘鳴當知在帝城西樹隱落月東窓見曉星霧露肫肫

未分明烏啼啞啞已流聲驚客思動客情客思鬱縱橫

翩翩孤雁何所棲依依別鶴半夜鳴今歲行已暮雨雪

向淒淒飛蓬旦夕起楊柳尚翻低氣鬱結涕滂沱愁思

無所託強作聽鐘歌 又范雲登城怨詩曰楚妃歌脩

竹漢女奏幽蘭獨以閨中笑豈知城上寒 又劉孝綽

班婕妤怨詩曰應門寂已閉非復後庭時況在青春日

萋萋綠草滋妾身似秋扇君恩絕履綦詎意遊輕輦從

今賤妾辭 增陶弘景寒夜怨詩曰夜雲生夜鴻驚悽

切嘹唳傷夜情空山霜滿高烟平鉛華沈照帳孤明寒

月微寒風緊愁心絕愁淚盡情人不勝怨思來誰能忍

梁王僧孺秋閨怨詩曰斜光隱西壁暮雀上南枝風

來秋扇屏月出夜燈吹深心起百際遙淚非一垂徒勞
妾辛苦終言君不知 又為何庫部舊姬擬薜蘿之句
出戶望蘭薰褰簾正逢君斂容裁一訪新知詎可聞新
人含笑近故人含淚隱妾意在寒松君心逐朝槿 又
為人寵姬有怨詩曰可憐獨立樹枝輕根易搖已為露
所浥復為風所飄錦衾襞未開端坐夜及朝是妾愁成
瘦非君重細腰 又為姬人自傷詩曰自知心裏恨還
向影中羞迴持昔慊慊變作今悠悠還君與妾扇歸妾

奉君裘斷弦猶可續心去最難留
原又吳均行路難

曰洞庭水上一株桐經霜觸浪向嚴風
昔時抽心曜白日今旦卧死黃沙中
洛陽名工見咨嗟一剪一刻作琵琶
白壁規心學明月珊瑚映面作風花
帝王見賞不見忘持攜把握登建章
掩抑摧藏張女彈殷勤促柱楚明光
年年月月對君子遙遙夜夜宿未央
未央綵女棄鳴笳爭見拂拭生光儀
茱萸錦衣玉作匣安念昔日枯樹枝
不學衡山南嶺桂至今千載猶未知
又曰青瑣門

外安石榴連枝接葉夾御溝金墉城西合歡樹垂條照
采拂鳳樓遊俠少年遊上路傾心顛倒相戀慕摩頂至
足買片言開胸瀝膽取一顧自言家在趙邯鄲翩翩舌
杪復劒端青驪白駁的盧馬金羈綠鞵紫絲鞵蹀躞橫
行不肯進夜夜汗血至長安長安城中諸貴臣爭貴儒
者席上珍復聞梁王好學問輕棄劒客如埃塵吾丘壽
王始得意司馬相如適被申大才大辨尚如此何況我
輩輕薄人又曰君不見西陵田從橫十字成陌阡君

不見東郊道荒涼蕪沒起寒烟盡是昔日帝王處歌姬
舞女達天曙今日翩妍少年子不知華盛落前去吐心
吐意許他人今且迴惑生猶豫山中桂樹自有枝心中
方寸自相知何言歲月忽若馳君之情意與我離還君
玳瑁金雀釵不忍見此使心危 又曰君不見長安客
舍門娼家少女名桃根貧窮夜紡無燈燭何言一朝奉
至尊至尊離宮百餘處千門萬戶不知曙唯聞啞啞城
上烏玉欄金井牽轆轤丹梁翠柱飛流蘇香薪桂火炊

雕旅當年翻覆無常定薄命為女必已麓 又費昶長

門怨詩曰向夕千悲起百恨何嗟及愁思且歸牀羅襦

方掩泣絳樹搖風軟黃鳥弄聲急金屋貯嬌時不言君

不入 又孔翁歸班婕妤怨詩曰長門與長信日暮九

重空雷聲聽隱隱車響絕籠籠恩光隨妙舞團扇逐秋

風鉛華誰不見人意自難同 又何思澄班婕妤詩曰

寂寂長信曉雀聲愁洞房蜘蛛網高閣駭薜被長廊虛

殿簾帷靜閒階花蕊香愁心視日暮還復守空牀 又

施榮泰王昭君詩曰垂羅下椒閣舉袖拂胡塵唧唧撫

心歎蛾眉誤殺人 又徐悱妻劉氏班婕妤好怨詩曰日

沒應門閉愁思百端生況復昭陽近風傳歌吹聲寵移

真不恨讒枉太無情祇言爭分理非妬舞腰輕 又王

叔英妻劉氏王昭君怨詩曰一生竟何定萬事良難保

丹青失應圖匣玉成秋草相接辭關淚至今猶未燥漢

使汝南還殷勤為人道 又范靖妻沈氏昭君歎詩曰

早信丹青巧重賂洛陽師千金畫雲鬢百萬寫蛾眉

陳陰鏗班婕妤詩曰柏梁新寵盛長信昔恩傾誰謂書

畫巧翻為歌舞輕花月分窓進苔草共階生憶淚衫前

滿單眠夢裏驚可惜逢秋扇何用合歡名 陳昭昭君

辭曰跨鞍今永訣垂涕別親賓漢地隨行盡胡關逐望

新交河壅塞霧隴日闇沙塵唯有孤明月猶能遠送人

增唐蕭嵩婕妤怨曰不分君恩斷新妝視鏡中容華

尚春日嬌愛已秋風枕席臨窓曉帷屏向月空年年後

庭樹榮落在深宮 王維班婕妤詩曰玉窓螢影度金

殿人聲絕秋夜守羅帷孤燈耿不滅 又曰怪來妝閣

閉朝下不相迎總向春園裏花間語笑聲 王諲後庭

怨曰君不見紅閨少女端正時夭夭桃李仙容姿幸得

君王憐巧笑披香殿裏薦蛾眉蛾眉雙雙人共進常恐

妾身從此擯甄妃為妬出層宮班女因猜下長信長信

宮門閉不開昭陽歌吹風送來夢中魂魄猶言是覺後

精神尚未迴念君嬌愛無終始使妾長啼後庭裏獨立

每看斜日盡一坐直至孤燈死秋日聞蟲翡翠簾春晴

照面鴛鴦水紅顏舊來花不勝白髮如今雪相似傳聞
紈扇思未歇預想蛾眉上初月如君貴偽不貴真還同
棄妾逐新人借問南山松葉意何如北砌槿花新 王
昌齡西宮春怨詩曰西宮夜靜百花香欲捲珠簾春恨
長斜抱雲和深見月朦朧樹色隱昭陽 又西宮秋怨
詩曰芙蓉不及美人妝水殿風來珠翠香却恨含情掩
秋扇空懸明月待君王 崔國輔怨詞曰樓頭桃李疎
池上芙蓉落織錦猶未成蛩聲入羅幕 李白夜坐吟

曰冬夜夜寒覺夜長沈吟久坐坐北堂水合井泉月入
閨金釭青凝照悲啼金釭滅啼轉多掩妾淚聽君歌歌
有聲妾有情情聲合兩無違一語不入意從君萬曲梁
塵飛 又玉階怨詩曰玉階生白露夜久侵羅襪却下
水晶簾玲瓏望秋月 又怨情詩曰美人捲珠簾深坐
顰蛾睂但見淚痕濕不知心恨誰 又長門怨詩曰天
迴北斗挂西樓金屋無人螢火流月光欲到長門殿別
作深宮一段愁 朱琳開緘怨詩曰夫壻邊庭久幽閨

恨幾重玉琴知別日金鏡識愁容懶寄雲中服慵開海
上封年年得衣慣且試莫裁縫 皇甫冉秋怨詩曰長

信多秋色昭陽借月華那堪閉永巷聞道選良家 又

婕妤怨詩曰花枝出建章鳳管發昭陽借問承恩者雙

蛾幾許長 雍陶美人春風怨詩曰澹蕩春風滿眼來

落花飛蝶共徘徊偏能飄散同心結無那愁眉吹不開

又貧居春怨詩曰貧居盡日冷風烟獨向簷牀看雨

眠寂寞春風花落盡滿庭榆莢似秋天 馬戴雀臺怨

詩曰魏宮歌舞地蜨戲鳥還鳴玉座人難到銅臺雨滴
平西陵樹不見漳浦草空生萬恨盡埋此徒懸千載名
劉滄洛神怨詩曰子建東歸恨思長飄飄神女步池
塘雲鬢高動水宮影珠翠乍搖沙露光心寄碧流空婉
孌夢殘春色自悠揚停車綺陌傍楊柳片月青樓落未
央曹鄴怨歌行曰丈夫好弓劒行坐說金吾喜聞有
行役結束不待車官田贈倡婦留妾侍舅姑舅姑皆已
死庭花半是蕪中妹尋適人生女亦嫁夫何曾寄消息

他處却有書嚴風厲中野女子心易孤貧賤又相負封

侯意何如 又金井怨詩曰西風催急景美人照金井

不見面上花却恨井中影 張喬長門怨詩曰御泉長

繞鳳凰樓自是恩波別處流閒標舞衣歸未得夜來砧

杵六宮秋 陸龜蒙洞房怨詩曰玉插朝扶鬢金梯晚

下臺春衫將別淚一夜雨難裁 鄭谷長門怨詩曰流

水君恩共不回杏花爭忍掃成堆殘春未必多烟雨淚

滴閒階長綠苔 高蟾長門怨詩曰天上何勞萬古春

君前誰是百年人
魂消尚愧金爐燼
思起猶慙玉輦塵
烟翠薄情攀不得
星芒浮艷採無因
可憐明鏡來相向
何似恩光朝夕新
王貞白湘妃怨詩曰
舜欲省蠻陬
南巡非逸遊
九山沈白日
二女泣滄洲
目極楚雲斷
恨深湘水流
至今聞鼓瑟
咽絕不勝愁
又長門怨詩曰

寂寞故宮春
殘燈曉尚存
從來非妾過
偶爾失君恩
花落傷容鬢
鶯啼驚夢魂
翠華如可待
應免老長門
帝
莊宮怨詩曰
一辭同輦閉
昭陽耿耿寒
宵禁漏長
釵上

翠禽應不返鏡中紅艷豈重芳螢低夜色棲瑤草水咽
秋聲傍粉牆展轉令人思蜀賦解將惆悵感君王 又
明妃詩曰不用牽心恨畫工帝家無策及邊戎香魂若
得昇明月夜夜還應照漢宮 崔道融長門怨詩曰長
門春欲盡明月照花枝買得相如賦君恩不可移 又
曰長門花泣一枝春爭奈君恩別處新錯把黃金買詞
賦相如自是薄情人 又班婕妤詩曰寵極辭同輦深
恩棄後宮自題秋扇後不敢怨春風 范浚讀長門賦

詩曰阿嬌負恃顏姝好那知漢帝恩難保一朝秋水落
笑渠幾歲長門閉春草自憐身世等前魚舊寵全移衛
子夫獨夜不眠香草枕東廂斜月上金鋪曉驚永巷車
音近失喜疑君枉瑤軫臨風望幸立多時却是輕雷聲
隱隱年年織女會牽牛百子池邊侍宴遊自從一落離
宮後無復穿針更上樓 姜夔琵琶洲詩曰松尾颼颼
石浪寒塞吟畚曲轉聲酸人間無此春風手應是江妃
夜夜彈 嚴羽蜀女怨詩曰幾時離月峽五見紫蘭凋

塞雁隨魂斷江花逐淚飄沙頭南北舍京口去來潮日

日無消息空登萬里橋 岳珂長門怨詩曰驚風不成

雨雲行去無蹤妾生三十年著籍長門宮宮車轆轤春

雷曉明星初熒綠雲擾增成丙舍爭迎鸞惟有長門閉

花鳥黃門聞玉題畫史圖蛾眉金鋪振瓊鑰玉秀生銅

池朝陽纔回金屋在轉盼不堪人事改入宮已作鄭袖

啼出塞那知延壽賣花殘鳥語頻長門春復春花鳥易

驚老況復門內人東風動地夜來惡萬翠千紅繞簾幕

莫能自有匪石心肯顧班姬秋扇薄長門勿輕怨視此
篋中扇白華兮綠衣自古兮有之 孟鯁折花怨詩曰
匆匆杯酒又天涯晴日牆東叫賣花可惜同生不同死
却隨春色去誰家 金高廷玉飛山怨詩曰漢家自有
飛將軍軍中駭嘆箭有神一朝乃與獄吏對惜無千金
書牘背手把屬鏤口銜鬚號天者三我何辜伊我壯志
長已矣不得提攜玉龍死可憐休唱白浮鳩只合秦人
悲杜郵 元劉因明妃曲曰初聞丹青寫明眸明妃私

喜六宮羞再聞北使選絕色六宮無慮明妃愁妾身只
有愁可必萬里今從漢宮出悔不別君未識時免使君
心憐玉質君心有愛在遠方寧恨妾身辭椒房飛鴻不
解琵琶語祇帶離愁歸故鄉 龍仁夫琵琶亭詩曰老
大蛾眉負所天忍將離怨付哀弦江心正好看明月又
抱琵琶過別船 范梈輓轡怨曰門前水揚聲似雨幽
人當窓碧弦語東里征夫去不歸一雙蛾眉鏡中舞年
年井上攀轆轤勞心只恐秋葵枯他年種得長生草梅

花落盡青青好 周權明妃曲曰逝水無回波去箭無
反筈十載昭陽春萬里龍荒月風沙滿宮衣慘淡餘香
歇哀絃濕絲淚淚盡絲亦絕寄語漢飛將此計誠太拙
蛾眉豈長好不久為枯骨 薩都拉江南怨詩曰江南
怨生男遠遊生女賤十三畫得蛾眉成十五新妝識郎
面識郎一面恩猶淺千金買官遊不轉郎家水田跨州
縣大船小船過淮甸買官未得不肯歸不惜韶華去如
箭楊花簾幕飛乳燕疎雨梧桐閉深院人生無如江南

怨楊維禎琵琶怨詩曰蜀絲鴛鴦織錦綃檀鳳凰

斷金槽絃抽甕繭五色毫雙成十指聲嘈嘈冢頭青草

天山雪眼中紅冰嵬下血哀弦淒斷感精烈池上蕤賓

躍方鐵劉炳寒夜怨詩曰月來愁亦來心憐月去愁

應改樓高月轉遲停箏坐倚薰籠待月落却成眠誰知

枕冷愁仍在劉永之行路難曰涉水多蛟龍跋山多

猛虎荒城荊棘上參天大澤脩蛇橫草莽百里慘黯無

人煙驅車暝行陷泥滓前車軸折後車來行人不覺旁

人哀眼前道路已如此何況太行高崔巍為君歌路難
請君試一聽位高金多豈足貴擊鐘鼎食未是榮東溝
水流西溝涸昨日花開今日落世事榮枯反覆手七尺
之軀安所托古來賢達人與時同卷舒龐公鹿門隱馬
生鄉曲居歟段聊乘下澤車何用終朝出畏途 明劉
基長門怨詩曰白露下玉除風清月如線坐看城上螢
飛入朝陽殿 又班婕妤詩曰昭陽秋清天如練笙歌
嘈嘈夜開宴長信宮中辭輦人獨倚西風咏紈扇傾城

自古有褒姒紅顏失寵何須怨泠泠玉漏掩重門一點

金釭照書卷 又宮怨詩曰何處春風拂苑牆飛飛片

片入昭陽多情尚有池邊柳留得啼鶯伴日長 王中

長門怨詩曰昭陽歌吹入獨自淚雙垂玉貌無如妾君

恩復在誰涼風搖繡戶明月墮金閨愁絕無人見流螢

點翠帷 高啓長門怨詩曰憎寵一時心塵生舊屋金

苔滋銷履跡花遠度鑾音暮雀重門迴秋螢別殿陰君

明猶不察妬極是情深 又征婦怨詩曰良人不願封

侯印虎符遠發當番陣幾夜春閨惡夢多竟得將軍覆
軍信身沒猶存舊戰衣東家火伴為收歸妾生不識邊
庭路尋骨何由到威武紙幡剪得招魂去只向當時送
行處 貝瓊行路難曰采玉于閩河問君勃律何時過
采珠鮫人室問君百粵何時出珠玉歲久同為塵君胡
重利不重身海有波缺我楫山有石摧我輪行路難出
門即羊腸何況萬里道管叔危周公匡人仇魯叟尊有
酒盤有壺鼓坎坎歌烏烏海不可涉山不可徒路旁之

人愛爾玉與珠行路難我以為父安知非虎我以為兄
安知非狼仰天悲歌泣下沾裳 梁寅玉階怨詩曰團

扇且棄置夕氣涼轉添流螢點魚鑰墮葉近蝦簾羅衣
舊恩賜不令珠淚霑 又怨歌行曰雲母屏風零露涼

蒲萄錦衾殘月光羞看繡帳雙鴛鴦徒費薰衣百和香

一寶釵頭上千黃金可憐墮并無復尋情如秋嶺朝朝
淡愁似春江日日深 二 鰻渙青樓怨詩曰錦樓花霧

飄綠塵芙蓉屏深凝淺春微酣著人嬌欲睡綵雲載夢

隔湘水雙螺小娃催理妝粉綿拂拭鸞鏡光濃黛掃眉
桂葉長涼露濯手薔薇香家本石城南市住早年悔作
青樓娼十八梳成金翅髻青蟲簪滑鴉背膩歌聲繞梁
揭塵起細黃咽秋鳳雛語翠綃舞衣珠珮結砑金天鵲
銀蛺蝶神女騎龍別楚宮巫雲蜀雨隨峽風別離何多
歡樂少牛女隔河怨秋老黃衫少年下樓去馬蹄隆隆
浩無主王璩瑤琴怨詩曰多情莫學澤中蘭有恨莫
為江上蓮蘭心守死心不改蓮根折斷絲猶牽君不見

天荒地老皆如此千古湘娥怨湘水至今血淚灑叢篁
點點香含露痕紫涔陽西望煙淒淒鷓鴣飛入煙中啼
蒼梧波杳彩雲滅萬里孤光秋月迷西風北渚蘋花白
歸夢未知身是客夜彈瑤瑟渡江來九疑翠黛濃如滴
瞿佑折花怨詩曰雙飛蝴蝶翻金粉風裏流螢棲未
穩銀瓶汲水漾漣漪下階自揀珊瑚枝雖然得入華堂
裏未必春光願如此樹頭花落還結子瓶內明朝抱香
死蘇平班婕妤詩曰一自辭同輦深宮草又生甘隨

紈扇棄猶記玉階行明月愁中影流鶯夢裏聲笙歌前
殿夜教妾若為情 鄒亮長門怨詩曰寵極愛憐初憎
生妬忌餘隔花聞鳳吹卷幔望鸞輿夜月開金屋秋塵
暗綺疏悲愁誰解賦惟有馬相如 又長信宮詩曰妙
舞方承寵愁懷獨感傷金輿門外度紈扇篋中藏別殿
閒秋月空階粲曉霜涼飈太情薄渾不到昭陽 又雜
怨詩曰漾舟采芙蓉迴橈過蓮浦與君剖蓮房試看誰
心苦 徐庸玉階怨詩曰宮院生秋草流螢入夜飛玉

階零白露涼沁越羅衣

銣績宕婦怨詩曰宕子行天

涯行行日云賒詎知閨中婦夙昔減容華憶夫上青山
下車逢狹邪路遙不可見拭淚徒怨嗟慎勿令婦嗟宕
子早還家不應薜蘿草化作菖蒲花

張璨吳宮怨詩

曰水殿新涼生白苧紫金鴛鴦錦雲裏吳王醉擁捧心
人七寶牀中嬌不起粉黛三千鎖別宮畫船相憶採芙
蓉芙蓉未老白露濃館娃嫋嫋生西風

又婕妤春怨

詩曰太液柳垂絲昭陽花滿枝如何長信草獨是見春

遲 李東陽申生怨詩曰十日進一胙君食不得嘗讒

言豈無端兒罪誠有名兒心有如地地墳終自傷兒生
不如犬犬得死君傍天地豈不廣日月豈不光悲哉復
何言一死以自明 又綿山怨詩曰五蛇上天一蛇蟄
綿山經月火不滅君侯恩重翻為仇不如放作山中囚
君侯有臣一非少貪天之徒但自保臣心見母不見君
誰言母死非君恩今辰何辰夕何夕留與千年作寒食
又淮陰歎詩曰營門晝開齊犬吠蒯生相人先相背

古來烏盡良弓藏近時刎頸陳與張功成四海身無地
歸楚楚疑歸漢忌極知猶豫成禍胎時乎時乎不再來
君王恩深辨士走淮陰胸中血一斗婦人手執生殺機
赤族不待君王歸君王歸神為惻獨不念秋毫皆信力
舍人一嗾彭王殂淮陰之辭真有无噫吁噫淮陰之辭
真有无 又數竒歎詩曰匈奴七十戰戰戰不得當一
當遂失道憤激摧肝腸君思念數竒將令抑不揚白頭
恥下獄飲泣橫干將敢也報父讐寧為刺客死路傍隴

西世節氣此志亦可傷陵乎爾誠才胡為辱死天一方

又明妃怨詩曰莫倚朱顏好妍媸無定形莫惜黃金
貴能為身重輕一生不識君王面不是丹青誰引薦空
將艷質惱君懷何似當時不相見君恩幸顧苦不早不
及春風與秋草却羨蘇郎男子身猶能仗節長安道休
翻胡語入漢宮祇恐伶人如畫工畫工形貌尚可改何
況依稀曲調中又弄潮怨詩曰莫弄潮潮水深殺人
莫射潮中有孝女魂魂來父與遊魂去父與沉潮能殺

人身不能溺人心潮水有盈縮人心無古今 彭華明

妃曲曰抱得琵琶不忍彈胡沙獵獵雪漫漫曉來馬上

寒如許信是將軍出塞難 徐禎卿落花怨詩曰青枝

參差露華浥落花辭春不能泣芳閨少年對躊躇有情

無言空悵悵落花含羞擬借問顏色與卿不相及江上

橫波暮轉深江干燕泥生紫蘋前程零落不可保多謝

嬌癡薄命人 黃省曾琵琶亭詩曰殘照皋亭夕秋風

旅雁飛琵琶千載恨淚滿逐臣衣 又班婕妤詩曰夢

斷清宵月愁深長樂宮無勞怨團扇漸冷是秋風何
景明瑤瑟怨詩曰美人竹間亭虛簾空月華相思湘江
曲淚盡生斑花花開為誰好花落不復埽出戶見春風
低頭怨芳草坐彈五十弦起視江月殘愁弦不堪聽手
澀金雁寒一彈正淒切再彈轉嗚咽三彈撥幽腸聲亂
冰絲結西風吹芙蓉一夜落微紅豈知瑤瑟音能消青
鏡容汪本邊夫怨詩曰一枝長戟六鈞弓千里山河
百戰中惆悵故園衣不到邊城容易起秋風蔣山卿

王昭君詩曰拭淚新裝束朝來殿裏辭何堪辭訣日却是見憐時漢騎臨關少胡笳出塞遲琵琶寫哀怨淒切轉添悲

原賦漢董仲舒士不遇賦曰嗚呼嗟乎遐哉邈矣時來曷遲去之速矣屈意從人非吾徒矣正身俟時將就木矣心之憂兮不期祿矣遑遑匪寧祇增辱矣努力觸藩徒摧角矣不出戶庭庶無過矣重曰生不丁三代之盛隆兮而丁三季之末俗末俗以辨詐而期通貞士以耿

介而自束雖曰三省于吾身猶懷進退之唯谷彼寔繁
之有徒指其白以為黑目信嫫而視眇口信辨而言訥
鬼神不能正人事之變戾聖賢亦不能開愚夫之違惑
出門則不可與偕往藏器又蚩其不容退洗心而內訟
固未知其所從觀上世之清暉廉士煢煢而靡歸殷湯
有卞隨與務光周武有伯夷與叔齊孰若反身于素業
莫隨世俗而輪轉雖矯情而獲百利不如正心而歸一
善又司馬遷悲士不遇賦曰悲夫士生之不辰愧顧

影而獨存恆克己而復禮懼志行而無聞諒才韜而世
戾將逮死而長勤雖有行而不彰徒有能而不陳何窮
達之易惑信美惡之難分時悠悠而蕩蕩將遂屈而不
伸使公于公者彼我同兮私于私者自相悲兮天道微
哉吁嗟濶兮人理顯然相傾奪兮好生惡死才之鄙也
好貴賤賤哲之亂也昭昭洞達胷中豁也昏昏罔覺內
生毒也我之心矣哲已能忖我之言矣哲已能選沒世
無聞古人惟恥朝聞夕死孰云其否逆順還周乍沒乍

起無造福先無觸禍始委之自然終歸一笑 又司馬

相如陳皇后長門賦曰願賜問而自進兮得尚君之玉

音奉虛言而望誠兮期城南之離宮修薄具而自設兮

君不肯乎幸臨浮雲鬱而四塞兮天窈窕而晝陰雷隱

隱而響起兮聲象君之車音刻木蘭以為櫟兮飾文杏

以為梁日黃昏而望絕兮悵獨託于空堂懸明月以自

照兮徂清夜于洞房援雅琴以變調兮奏愁思之不可

長案流徵以却轉兮聲窈妙而復揚搏芬若以為枕兮

席荃蘭而藍香忽寢寐而夢想兮魂若君之在傍
班婕妤自悼賦曰承祖考之遺德荷性命之淑靈登薄軀
於宮闈充下陳於後庭蒙聖皇之渥惠當日月之盛明
揚光烈之翕赫奉隆寵於增城既過幸于非位竊庶幾
乎嘉時陳女圖而鏡鑑顧女史而問詩歷年歲而悼懼
閔蕃華之不滋白日忽以移光遂暗漠以昧幽猶被覆
載之厚德不廢捐于罪尤奉供養於東宮託長信之末
流重曰潛玄宮兮幽以清應門閉兮禁闥扃華堂塵兮

玉階苔中庭萋兮綠草生神眇眇兮容靜處君不御兮
誰為榮俯視兮丹墀思君兮履綦仰視兮雲屋雙涕兮
橫流顧左右兮和顏酌羽觴兮銷憂惟人生兮一世忽
一過兮若浮 魏卞廙蔡伯喈女賦曰伊太宗之令女
稟神惠之自然在華年之二八披鄧林之曜鮮明六列
之尚致服女史之話言參過庭之明訓才朗悟而通玄
當三春之嘉月時將歸于所天曳丹羅之輕裳戴金翠
之華鈿美榮曜之所茂哀寒霜之已繁豈偕老之可期

庶盡歡於餘年何大願之不遂飄微軀于逆邊行悠悠
于日遠入窮谷之寒山慙栢舟于千祀負冤魂於黃泉
俄羈虜其如昨經春秋之十二忍胡顏之重恥恐終風
之我萃咏芳草于萬里想音塵之髣髴祈精爽於交夢
終寂寞而不至哀我生之何辜為神靈之所棄仰薜華
其已落臨桑榆之歎歔入穹廬之秘館亟踰時而經節
歎殊類之非匹傷我躬之無悅修膚體以深念歎蘭澤
之空設佇美目於無忌向凱風而泣血 梁江淹恨賦

曰試望平原蔓草縈骨拱木斂魂人生到此天道寧論
于是僕本恨人心驚不已直念古者伏恨而死若乃趙
王既虜遷于房陵薄暮心動昧旦晨興別艷姬與美女
喪金輿及玉乘置酒欲飲悲來填膺千秋萬歲為怨難
勝至如李君降北名辱身冤拔劍擊柱弔影慚魂若夫
明妃去時仰天太息紫臺稍遠關山無極搖風忽起白
日西匿隴雁少飛岱雲寡色望君王兮何期終無絕兮
異域至于敬通見抵罷歸田里閉關却掃塞門不仕左

對孺人右顧稚子脫畧公卿跌宕文史齎志沒地長懷
無已若夫中散下獄神氣激揚濁醪夕引素琴晨張秋
日蕭索浮雲無光鬱青霞之奇志入脩夜之不暘或有
孤臣危涕孽子墜心遷客海上流戍隴陰此人但聞悲
風汨起泣下沾衿亦復含酸茹歎銷落湮沈若乃騎疊
跡車屯軌黃塵匝地歌吹四起無不烟斷火絕閉骨泉
裏已矣哉春草暮兮秋風驚秋風罷兮春草生綺羅畢
兮池館盡琴瑟滅兮丘隴平自古皆有死莫不飲恨而

吞聲

愁一

原莊子曰不知乎人謂之愚知乎則反愁我軀不仁則害人仁則反傷我身不義則傷彼義我則反愁我已

愁二

原左傳曰晉人謀去故絳諸大夫曰必居郇瑕氏之地沃饒而近鹽魏獻子曰不如新田土厚水深居之不疾郇瑕氏土薄水淺其惡易覲覲則民愁愁則墊隘于是

乎有沈溺重脰之疾 又曰吳公子札來聘請觀于周

樂為之歌頌曰至矣哉哀而不愁

知命也

樂而不荒

節之以禮

吳越春秋曰越王念吳欲復讐愁心苦志中夜抱柱而哭承之以嘯羣臣聞之曰君王何愁心之甚也夫復讐謀敵非君王之憂自臣小之急務也 楚辭曰天問者屈原所作也屈原放逐憂心愁悴彷徨山澤經歷陵陸嗟號日聞仰天歎息楚有先王之廟及公卿祠堂圖畫天地山川神靈奇偉及古聖賢怪物行事周流罷倦

休息其下仰見圖畫因書其壁呵而問之以洩憤懣書
寫愁思 又曰漁父者屈原所作也屈原馳逐江湘之
間憂愁吟歎而漁父避世隱身釣魚江濱欣然自樂時
遇屈原川澤之域怪而問之遂相應答 史記曰虞卿
著書八篇號曰虞氏春秋太史公曰虞卿非窮愁不能
著書自見於後世 後漢書曰梁冀妻色美善為妖態
作愁眉 郭子曰王東海王丞字安期初過江登瑯邪山歎
曰我由來不愁今日直欲愁

愁三

增愁城

庾信愁賦曰攻許愁城終不破盪許愁門終不開何物煮愁愁能得熟何物燒愁愁能得然閉門欲

去愁愁終不肯去深藏欲避愁愁已知人處

萬斛

誰知一寸心乃有萬斛愁

寄愁

仲漢

長統詩寄愁天上埋憂地下

愁逼

段成式句愁逼夜長斜漢迴而脈脈寒侵夢淺行雲去以遲遲

解愁

古詩所曰漢武帝為膠東王時長公主嫖有女欲與王婚抱王置膝上問曰兒欲得婦否長主

指長御百餘人皆云不用指其女問曰阿嬌好否笑對曰若得阿嬌作婦當作金屋貯之遂成婚及為后擅寵驕貴十餘年而無子元光五年廢居長門宮愁悶悲思聞司馬相如工文章奉黃金百斤令為解愁之辭相如為作長門賦武帝見無歡又曰魏陳思王植每欲別而傷之更得親幸見談及時政幸冀試用終

不能得時法制待藩國峻迫植
十一年而三徙都常汲汲無歡

看朱成碧

王僧孺詩
又武后詩

曰看朱成碧思紛紛
憔悴支離為憶君

愁四

原詩後漢張衡四愁詩曰我所思兮在泰山欲往從之
梁甫艱側身東望涕霑翰美人贈我金錯刀何以報之
英瓊瑤路遠莫致倚逍遙何為懷愁心煩勞 又曰我
所思兮在桂林欲往從之湘水深側身南望涕沾襟美
人贈我翠琅玕何以報之雙玉盤 又曰我所思兮在

漢陽欲往從之隴坂長側身西望涕沾裳美人贈我貂

襜褕何以報之明月珠 又曰我所思兮在雁門欲往

從之雪紛紛側身北望涕沾巾美人贈我錦繡段何以

報之青玉案 晉張載擬四愁詩曰我所思兮在南巢

欲往從之巫山高佳人遺我筒中布何以報之流黃素

又曰我所思兮在朔湄欲往從之白雪霏佳人遺我

雲中翮何以贈之連城壁 又曰我所思兮在隴原欲

往從之隔泰山佳人遺我雙角端何以贈之雕玉環

又曰我所思兮在營州欲往從之路阻脩佳人遺我綠

綺琴何以贈之雙南金 宋王徽咏愁詩曰自予抱羈

思眇與日月長載離非宋遠誰謂河難航憂隨積霖密

慨因朗旭彰負之苦不勝即之竟無方如彼引鯢魚待

盡守空梁天地豈私貧運至豈固當既悟非形兆茲數

詎可攘 梁王僧孺夜愁示諸賓詩曰簷露滴為珠池

水合如壁萬行朝淚瀉千里夜愁積孤帳閉不開寒膏

盡復益誰知心眼亂看朱忽成碧 又忽不任愁聊示

固遠詩曰去秋客舊吳今春投故越淚逐東歸水心挂
西斜月未應歲貶顏直以憂殘髮 又劉孝綽夜不得
眠詩曰夜長愁反覆懷抱不能裁披衣坐惆悵當戶立
徘徊風音觸樹起月色度雲來夏葉依窓落秋花當戶
開光陰已如此復持憂自催 又劉孝先和兄孝綽夜
不得眠詩曰夜愁眠不安起望臺南端葉慘風聲異樓
空月色寒窅冷調還數弦脆上琴難百年行詎幾萬慮
坐相攢誰家有明鏡暫借照心看 增梁沈約學省愁

臥詩曰秋風吹廣陌蕭瑟入南闌愁人掩軒卧高窓時
動扉虛館清陰滿神宇曖微微網蟲垂戶織夕鳥傍簷
飛纓佩空為忝江海事多違山中有桂樹歲暮可言歸
杜牧愁詩曰聚散竟無形迴腸自結成古今留不得
離別又潛生降虜將軍思窮秋遠客情何人更憔悴落
第泣秦京溫庭筠春愁曲曰紅絲穿露珠簾冷百尺
啞啞下纖綆遠翠愁山入卧屏兩重雲母空烘影涼簷
墜髮春眠重玉兔氤氲柳如夢錦疊空牀委墜紅颼颼

掃尾雙金鳳蜂喧蜨戲俱悠揚柳拂赤闌纖草長覺後

梨花委平綠春風和雨吹池塘又客愁詩曰客愁看

柳色日日逐春深蕩漾春風裏誰知歷亂心李羣玉

湘中古愁詩曰涼風西海來直渡洞庭水脩脩木葉下

白浪連天起蘅蘭委皓霜百草一時死摧殘負志人感

歎何窮已又曰昔我觀雲夢窮秋經汨羅靈均竟不

返怨氣成微波奠桂開古祠朦朧入幽蘿落日瀟湘上

淒涼吟九歌又曰南雲哭重華水死悲二女天邊九

點黛白骨迷處所朦朧波上瑟清夜降北渚萬古一雙
魂飄飄在煙雨 又客愁詩曰客愁看柳色日日逐春

長憑送湘流水綿綿入帝鄉 韓琮春愁詩曰金烏長

飛玉兔走青鬢長青古無有秦娥十六語如弦未解貪

花惜楊柳吳魚嶺雁無消息水誓蘭情別來久勸君年

少莫遊春暖風遲日濃于酒 曹鄴三愁詩曰遠夢如

水急白髮如草新歸期待春至春至還送人 又曰澗

草短短青山月朗朗明此夜目不掩屋頭烏啼聲 又

曰別家鬢未生到城鬢似髮朝朝臨川望灞水不入越
韓偓擁鼻詩曰擁鼻悲吟一向愁寒更轉盡未回頭
綠屏無睡秋分簟紅葉傷時月午樓却要因循添逸興
若為趨競愴離憂殷勤憑仗官渠水為到西溪動釣舟
韋莊愁詩曰避愁愁又至愁事事難忘夜作心中火
朝為鬢上霜不經公子夢偏入旅人腸借問高軒客何
鄉是醉鄉又春愁詩曰寓思本多傷逢春恨更長露
沾湘竹淚華墮越梅妝睡怯交加夢閒傾潋灩觴後庭

人不到斜月上松篁 又曰自有春愁正斷魂不堪芳
草思王孫落花寂寂黃昏雨深院無人獨倚門 晁沖

之紀愁詩曰北風吹我裳夏潦漂我屋牛羊殘我稼雀
鼠耗我穀雪寒墮我指雨淫疾我腹朝行桑榆間秋序
傷遠目莫涉水之涯含沙中兩足攬轡馬病黃伏軾輿
脫輻陟山既見虎還舍乃對鵬一沐三握髮十飯九不
肉先生當離垢居士今耐辱飽聞戒畏途那知有沈陸
胡銓買愁村詩曰北往常思聞喜縣南來怕入買愁

村區區萬里天涯路野草芳烟正斷魂
陸游春愁曲

曰伏羲至今三十餘萬歲春愁日日常相似外大瀛海
環九州無有一州無此愁我願無愁但歡樂朱顏綠鬢
常如昨金丹九轉徒可聞玉兔千年空搗藥蜀姬雙顰
姪姹嬌醉看恐是海棠妖世間無處無愁到底事難過
萬里橋方岳不寐詩曰不寐何為者幽居事更稠怯
風思鶴冷聞雨為花愁草合妨遊屐沙崩壓釣舟看蓑
故無恙欹枕數更籌真山民夜坐詩曰匹馬平生汗

漫遊如今寂寞老林丘小窓半夜青燈雨幽樹一庭黃
葉秋懶看世情寧睡去怕傷時事莫吟休寒蛩可是知
人意未到莎根只說愁金朱并秋夜詩曰秋夜雖漸
永未抵客愁長秋月雖已圓不照寸心方將心貯此愁
真作萬斛量惟月憐此夜誰共千里光空令還家夢欲
趁征鴻翔又客夜詩曰城月四更上窓風一室幽纖
雲縈雁塞重露逼貂裘兵革何年息乾坤此夜愁殊鄉
兩行淚騷屑灑清秋高士談春愁曲曰壓花曉露萬

樹冷金井咿啞轉纖縷寶階寂寂苔紋深東風搖碎湘
簾影芙蓉帳暖春眠重窓外啼鶯喚新夢推枕起來嬌
翠顰一線沈烟困金鳳遊絲飛絮俱悠颺慵倚繡牀春
晝長郎馬不嘶芳草暗半篩急雨飛橫塘元許衡不
寐詩曰秋宵初感慨展轉不成眠老況青燈外羈愁白
髮邊蹉跎嗟往事安穩憶歸年却起開門坐霜清月滿
天同恕愁詩曰來時容易去何遲半在胸中半在眉
門掩落花春去後窓含殘月酒醒時濃如野外連天草

亂似空中惹地絲除却五侯歌舞地人間何處不相隨

宋元春愁詩曰金雁塵香暗鳳弦紅繩風緊閣秋千

園林寂寞無鶯燕一段春愁是杜鵑殷全不寐詩曰

中夜不成寐起來看明月候蟲吟一聲愁腸幾回折愁

腸折還續宛轉如環玦出戶野躊躇商飈倏已發商飈

來何許吹我頭上髮莫吹淚入河添之作嗚咽盛或

和春愁曲曰鶯黃柳枝撲輕雨裊斷新愁千萬縷菱花

倦拂瑣窓閒吹得瑤笙雜鶯語下牀不受春風扶傷春

擊碎青珊瑚香消玉散繡針澀間開五色雙氍毹離恨

難禁情未愜那肯將心託紅葉翠帷深護曲闌花羞殺

東家白蝴蝶 張寧莫愁樂詩曰金雀玉搔頭生來喚

莫愁自從歡去後不出石城遊 楊守陳不寐詩曰客

夜耿無寐其如鐘漏稀入簾霜氣重當戶月華微切切

候蟲語蕭蕭寒葉飛擁衾成永歎不是為無衣 林大

輅不寐詩曰擁被息塵想瀟瀟雨到蓬孤城連禁柝永

夜動悲風往事疎燈裏新愁濁酒中南歸稀信使明發

報征鴻

原賦魏曹植敘愁賦曰時家二女弟故漢皇帝聘以為
貴人家母見二弟愁思故令予作賦曰嗟妾身之微薄
信未達乎義方遭母氏之聖善奉恩化之彌長迄盛年
而始立修女職於衣裳承師保之明訓誦六列之篇章
觀圖像之遺形竊庶幾乎英皇委微軀于帝室充末列
於椒房荷印紱之令服非陋才之所望對牀帳而太息
慕二親以增傷揚羅袖而掩涕起出戶而徬徨顧堂宇

之舊處悲一別之異鄉 又愁思賦曰四節更王兮秋

風悲遙思惆恍兮若有遺原野蕭條兮烟無依雲高氣
靜兮露凝衣野草變色兮莖葉稀鳴蜩抱木兮雁南飛
歸室解裳兮步庭前月光照懷兮星依天居一世兮芳
景遷松喬難慕兮誰能仙長短命也兮獨何愆 又九
愁賦曰嗟離思之難忘心慘毒而含哀踐南畿之末境
超引領之徘徊眷浮雲以太息願攀登而無階匪狗榮
而愉樂信舊都之可懷恨時王之謬聽受姦枉之虛辭

揚天威以臨下忽放臣而不疑登高陵而反顧心懷愁
而荒悴念先寵之既隆哀後施之不遂雖危亡之不豫
亮無遠君之心刈桂蘭而秣馬舍予車于西林願接翼
于歸鴻嗟高飛而莫攀因流景而寄言響一絕而不還
傷時俗之趨險獨惆悵而長愁感龍鸞而匿迹如吾身
之不留竄江介之曠野獨眇眇而泛舟思孤客之可悲
愍予身之翱翔豈天監之孔明將時運之無常謂內思
而自策筭乃昔之愆殃以忠言而見黜信無負于時王

俗參差而不齊豈毀譽之可同競昏瞽以營私害予身
之奉公共朋黨而妬賢俾予濟乎長江嗟大化之移易
悲性命之攸遭愁慊慊而繼懷怛慘慘而情挽曠年載
而不迴長去君乎悠遠御飛龍之蜿蜒揚翠霓之華旌
絕紫霄而高鶩飄弭節於天庭披輕雲而下觀覽九土
之殊形顧南郢之邦壤咸蕪穢而倚傾駭盤桓而思服
仰御驤以悲鳴紓予袂而收涕僕夫感以失聲履先王
之王路豈淫徑之可遵知犯君之招咎恥干媚而求親

顧旋復之無軌長自棄于遐濱與麋鹿而為羣宿林藪
之歲暮野蕭條而極望曠千里而無人民生期于必死
何自苦以終身寧作清水之沈泥不為濁路之飛塵踐
蹊徑之危阻登峒堯之高岑見失羣之離獸覲偏棲之
孤禽懷憤激以切痛若回刃之在心愁戚戚其無為遊
綠林而逍遙臨白水以悲嘯猿驚聽而失條亮無怨而
棄逐乃余行之所招 魏繁欽愁思賦曰何旻秋之慘
慘處閒夜而懷愁潛白日于玄陰翳朗月于重幽零雨

濛其迅集潢淹汨以橫流聽峻階之回雷心沈切以增
憂嗟王事之靡盬士感時而情悲願出身以徇役式簡
書以忘歸時陟岵以旋顧涕漸纓而鮮晞聽鳴鶴之哀
音知我行之多違悵俯仰而自憐志躑躅而摧戚聊弦
歌以厲志勉奉職于閨闈又弭愁賦曰傷有閑之淑
女採薜荔于朝陽露素質之皎皎綰玄髮以流光結翠
葉于珠簪擢丹華于綠房點圓的之熒熒映雙輔而相
望襲遊閑之妓服禡阿穀之袿裳紉畹蘭于纓佩動掩

暖以遺芳既容冶而多好且妍惠而纖微顧見予之獨
立知我情之思歸鳴環瑱以回眄若欲進而行遲眷紅
顏之煜煜何的爍之少羣整桂冠而自飾敷綦藻之華
文從景炎而猗靡粲綿邈以繽紛時瞭眇以含笑收婉
媚以愁人 梁簡文帝序愁賦曰情無所治志無所求
不懷傷而忽恨無驚猜而自愁玩飛花之入戶看斜暉
之度寮雖復玉觴浮椀趙瑟含嬌未足以祛斯耿耿息
此長謠

原文魏曹植釋愁文曰予以愁慘行吟路邊形容枯悴
憂心如焚有玄虛先生見而問之曰子將何疾以至於
斯答曰吾所病者愁也先生曰愁是何物而能病子乎
答曰愁之為物惟惚惟恍不召自來推之弗往尋之不
知其際握之不盈一掌寂寂長夜或羣或黨去來無方
亂我精爽其來也難進其去也易追臨餐困於哽咽煩
冤毒於酸嘶加之以粉飾不澤飲之以鯁肴不肥溫之
以火石不消摩之以神膏不稀受之以巧笑不悅樂之

以絲竹增悲醫和絕思而無措先生豈能為我著龜乎
先生作色而言曰予徒辨子之愁形未知子愁所由生
吾獨為子言其發矣今大道既隱子生末季沉溺流俗
眩惑名位濯纓彈冠諮諏榮貴坐不安席食不終味遑
遑汲汲或慘或悴所鬻者名所拘者利良田華薄凋損
正氣吾將贈子以無為之藥給子以淡泊之湯刺子以
玄虛之鍼灸子以淳樸之方安子以恢廓之宇坐子以
寂寞之牀使王喬與子攜手而遊黃公與子咏歌而行

莊生為子具養神之饌老聃為子致愛性之方趨遐路以棲跡乘輕雲以高翔于是精駭意散改心回趣願納至言仰崇元度衆愁忽然不辭而去

喜一

增說文曰喜樂也不言而悅也 易曰上九傾否先否後喜 尚書曰股肱喜哉元首起哉 毛詩曰風雨如晦雞鳴不已既見君子云胡不喜 又曰我有嘉賓中心喜之 又曰菁菁者莪樂育才也君子能長育人才

則天下喜樂之也 禮記曰樂者音之所由生也其本

在人心之感于物也是故其喜心感者其聲發以散

又曰人喜則斯陶陶斯咏咏斯猶猶斯舞 又曰何謂

人情喜怒哀懼愛惡欲七者弗學而能也 爾雅曰坎

坎塤塤喜也 春秋繁露曰春之為言蠢也蠢蠢者喜

樂之貌 莊子曰夫傳兩喜兩怒之言天下之難者也

夫兩喜必多溢美之言兩怒必多溢惡之言故法言曰

傳其常情無傳其溢言則幾乎全 抱朴子曰人主有

道國有善政則四七從度五星不逆日不蝕朔月不薄望霜不夏繁雷不冬洩喜瑞並臻災厲寢滅此則天喜也淮南子曰喜怒者道之邪也又曰大喜墜陽

太平御覽顏子曰夫哀樂喜怒愛憎欲懼人之情也當其哀也則哭泣擗踊遇其喜也則欲歡笑鼓舞又程顥曰聖人之喜以物之當喜聖人之怒以物之當怒是聖人之喜怒不繫於心而繫於物也太公六韜曰因其所喜以順其志

喜二

增列子曰堯微服遊于康衢聞兒童謠曰立我烝民莫匪爾極不識不知順帝之則堯喜曰疇教爾為此言童兒曰我聞之大夫問大夫曰古詩也 尚書申侯曰維

王既誅崇侯虎諸侯貢萬民咸喜 禮記曰文王為世

子朝于王季曰三雞初鳴而衣服至于寢門外問內豎曰今日安否何如內豎曰安文王乃喜 又曰武王承命興師誅商萬國咸喜軍發孟津前歌後舞 楚辭曰

師望在肆昌何識鼓刀揚聲后乃喜 汲冢周書曰師

曠見太子晉曰不遠長道而求一言王子應之曰吾聞

太師將來甚喜而又懼吾年甚少見子而懾盡忘吾其

度 左傳曰城濮之役晉師三日穀文公猶有憂色左

右曰有喜而憂如有憂而喜乎公曰得臣猶在憂未歇

也困獸猶鬪況國相乎及楚殺子玉公喜而後可知也

又曰子產始知然明問為政焉對曰視民如子見不

仁者誅之如鷹鷂之逐鳥雀子產喜以語子太叔曰他

日吾見蔑之面今吾見其心矣 又曰鄭六卿餞韓宣
子于郊宣子曰二三君子請賦起亦以知鄭志子柳賦
擇兮宣子喜曰鄭其庶幾乎 公羊傳曰九月丁卯子
同生子同者孰謂謂莊公也何言乎子同生喜有正也
此言喜有正何久無正子也 又曰齊高子來盟高子
者何齊大夫也何以不稱使我無君也然則何以不名
喜之也 國語曰孫伯宗朝以喜歸其妻曰子貌有喜
何也曰吾言于朝諸大夫皆謂我知似陽子對曰陽子

華而不實言而無謀是以難及于身子何喜焉 韓詩
外傳曰曾子曰吾嘗仕為吏祿不過鍾釜尚有欣欣然
而喜者非以為多也樂其逮親也 列子曰鄭人有薪
于野者遇駭鹿從而擊之斃恐人之見也遽藏諸隍中
覆之以蕉不勝其喜 戰國策曰呂他亡西周之東周
盡輸西周之情于東周東周大喜 又曰孟嘗君出行
國至楚楚獻象牀郢之登徒直送之不欲行見孟嘗君
門人公孫戍曰臣郢之登徒直送象牀象牀之直千金

傷此若髮標賣妻息不足以償足下能使僕無行先人有寶劍願得獻之戍曰諾入見子孟嘗君曰諸國所以皆致相印于君以國事累君者悅君之義慕君之廉也今君至楚而受象牀所未至之國將何以待君孟嘗君曰善戍趨而出孟嘗君曰今子何舉足高志之揚也戍曰臣有大喜三重之以寶劍一孟嘗君曰何謂也戍曰門下百數莫敢入諫臣入諫一喜諫而聽臣二喜諫而止君之過三喜史記曰趙使藺相如賁壁西入秦秦王

坐章臺見相如相如奉璧秦王大喜傳璧以示美人及左右左右皆呼萬歲又曰呂后謂高祖季所居之上常有雲氣故從往常得季高祖心喜漢書曰高祖入關與父老約法三章民大喜又曰英布間行與隨何俱歸漢王王方踞牀洗足召布入見布大怒悔來欲自死就舍帳御食飲從官如漢王居布又大喜又曰蕭何聞韓信亡不及以聞自追之人有言上丞相何亡上怒如失左右手居一二日何來謁上且怒且喜西京

雜記曰樊將軍噲問陸賈曰自古人君皆云受命于天
云有瑞應豈有是乎賈應之曰有之夫目矐得酒食燈
大花得錢財鴉鵲噪則行人至蜘蛛集而百事喜也

漢書曰翟方進隨父至汝南蔡父竒方進形貌有封侯
骨方進既厭為小吏聞蔡父言心喜又曰匈奴單于

言願壻漢氏以自親元帝以後宮良家子王嬙字昭君
賜單于單于欣喜東觀漢記曰上謂鮑永曰我攻懷
三日兵不下關東畏卿且將故人往即拜永諫大夫至

懷謂太守曰足下所以堅不下者未知孰是也今聖主
即位天下已定不降何待即開城降上大喜與永對食
又曰賈復北與五校戰于真定大破之復傷瘡甚上
驚復病尋愈追及上上見大喜 又曰梁鴻妻椎髻著
布衣操作具而前鴻大喜曰此真梁鴻之妻也 又曰

上幸長安祠高廟十一陵歷覽宮館舊處會郡縣吏勞
賜作樂有縣三老大言陛下入東都臣望顏色儀類似
先帝臣一驩喜百官嚴設如舊時臣二驩喜見吏賞賜

識先帝時事臣三驩喜陛下聽用直諫默然受之臣四
驩喜陛下至明懲艾酷吏視人如赤子臣五驩喜進賢
用能各得其所臣六驩喜天下太平德合于堯臣七驩
喜又曰上以馮異為益津將軍屯河上擊走朱鮪追
至洛陽城門環城一匝乃還上聞之太喜諸將皆賀

又曰郭伋字細侯在并州素結恩德行部到西河有童
兒數百各騎竹馬于道次迎拜伋問曰兒曹何自遠來
對曰聞使君到喜故來奉迎續漢書曰荀爽嘗謁李

膺因為其御既還喜曰今日乃得御李君矣 零陵先

賢傳曰劉巴入益州劉璋見而驚喜每事咨問璋遣法

正迎劉備巴諫不聽閉門稱疾備攻成都命軍中曰其

有害巴者誅及三族及得巴甚喜 司馬彪九州春秋

曰曹公與袁紹相距遣人招張繡繡欲歸紹賈詡勸繡

歸曹公公見之喜執詡手曰使我信重于天下者君也

邴原別傳曰魏太祖為司空辟原署東閣祭酒太祖

北伐克單于還曰孤返鄴諸君必來迎其不來者獨邴

祭酒耳言訖未久而原先至門下通謁太祖大喜 魏
志曰荀彧薦郭嘉名見論天下事太祖喜曰使孤成大
業者必此人也嘉出亦喜曰真吾主矣 張勃吳錄曰
長沙桓王在歷陽遣書呼周瑜瑜將兵五百船糧器仗
星夜馳赴王大喜執瑜手曰卿至諧矣 雷煥別傳曰
張華以煥為豐城令得雙寶劍乃送一劍與華自留一
劍華甚喜曰此干將也 檀道鸞續晉陽秋曰謝玄既
破賊有驛書至謝安方對客圍碁看書既畢了無喜色

還碁如故客問之徐曰小兒輩遂已破賊客罷還內過
戶安心喜甚不覺履齒之折 崔鴻後秦錄曰秦末祆
星見于東井尹綽知秦將滅心喜踴躍向天再拜 孫
嚴宋書曰劉宣字萬壽素曉天文知晉室當復又夢九
土服之覺而喜曰九者桓也桓既吞矣吾當復本土乎
唐書曰陸贄從幸山南道途艱險扈從不及與帝相
失一夕不至上喻軍士曰得贄者賞千金翼日贄謁見
上喜形于顏間其寵待如此 通鑑宋紀曰英宗時翰

林學士劉敞進讀史記至堯授舜以天下拱而言曰舜
至側微堯禪之以位天地享之百姓戴之非有他道惟
孝友之德光于上下耳帝悚然改容太后聞之亦大喜
又曰司馬光差役之復為期五日同列病其太迫知
開封府蔡京獨如約悉改畿縣雇役無一違者詣政事
堂白光光喜曰使人人奉法如君何不可行之有

喜三

增天心 雲氣

春秋元命苞兩口銜士為喜喜得朋心
喜者為意意天心 史記慶雲喜氣也

似春

毘陽

莊子古之真人其寢不夢其覺無憂其出不訢其入不距淒然似秋煖然似春

喜怒哀通四時

又曰人大喜邪毘于陽大怒邪毘于陰陰陽并毘四時不至使人喜怒失位居處無常

施舍

收正

左傳喜有施舍怒有戰鬪喜生于好怒生于惡公孫尼子君子怒則說之以和喜

則收之

原孔子攝相

毛義受官

史孔子由大司寇攝行相事有喜色

門人曰聞君子禍至不懼福至不喜孔子曰有是言也

不曰樂其以貴下人乎後漢書毛義家貧以孝行稱

張奉慕其名候之會府檄至以義守令義奉檄入喜動顏色

喜四

原生於風

白帖喜生于風

形於色

又曰喜形于色

式宴以喜

詩

一則以喜

謂孝子見親年老而猶克壯也

油然

汲冢周書人有五氣喜氣內畜雖然隱之

陽喜必見喜色油然以出

增粹然

說文口豈為喜豈者陳樂立而上見也人心之悅則其面目粹

然而變知其喜也

趺然

莊子夫逃虛空者藜藿柱乎鼃鼃之逕踉位其空聞人足音趺然而喜矣

而況乎昆弟親戚之馨歎其側者乎

瞿然

又曰九方歿謂子綦相子曰相也為祥子綦瞿然喜索然

涕

脫然

淮南子今夫繇者揭鑊而負籠土鹽汗交流喘息薄喉當此之時得休樾下則脫然而喜

矣巖穴之間非直樾下之休也

見譽

文中子聞謗而怒者讒之由也見譽而喜者佞之媒也絕由去

媒讒佞遠矣

私喜

漢書呂須當以陳平前為高帝謀執樊噲數讒平于呂后曰為丞相不治事日

飲醇酒戲婦人平聞曰益甚太后聞之私喜

四喜

曹植表曰臣得去幽屏之城獲觀百官之美此

一喜也背茅茨之陋登閭闔之闥此二喜也必以有配之容瞻見穆穆之顏此三喜也將以擣扚之質稟受崇聖之訓此四喜也灑然唐書高祖謂秦王曰爾還洛陽行臺

說帝言秦王左右皆山東人聞還津津又曰初三宰洛皆灑然喜觀其意不復來矣相就位二人

罄折趨而李林甫在中軒驚無少讓喜津津出眉宇間少選詔書出耀卿九齡以左右丞相罷林甫嘻笑曰尚

左右丞相邪眉端劉禹錫呂集序呂溫得一善輒盱衡擊節揚袂頓足信容得色舞于眉端

怒一

增說文曰怒恚也禮記曰父母怒不悅而撻之流血

不敢疾怨起敬起孝通鑑程顥答張載書曰人之情

易發而難制者惟怒為甚第能于怒時遽忘其怒而觀理之是非亦可見外誘之不足惡而于道亦思過半矣元史曰或問為治趙良弼曰必有忍乃其有濟人性易發而難制者惟怒為甚必克已然後可以制怒必順理然後可以忘怒惟忍所難忍容所難容事斯濟矣

怒二

增左傳曰公孫閱與潁考叔爭車潁考叔挾輶以走子都拔棘以逐之及大逵弗及子都怒

子都閱也

又曰先軫

朝問秦四公曰夫人請之我舍之矣先軫怒曰武夫力而拘諸原婦人暫而免諸國墮軍實而長寇讐亡無日矣不顧而唾 吳越春秋曰吳王伐齊請公孫聖告之聖諫願大王勿伐齊王大怒曰吾天之所生神之所助使力士石番擊以鐵槌身絕為五 又曰子胥諫吳王王怒賜以屬鏹之劍盛以鴟夷之器投之于江 莊子曰孔子往見盜跖謁者通之盜跖忿怒目如明星髮上指冠 烈士傳曰秦召魏公子無忌無忌不行使朱亥

奉壁一雙秦王大怒將朱亥著虎圈中亥瞋目視虎皆
裂血出濺虎虎不敢動 韓子曰孟孫獵得麕使秦巴
持之其母隨而呼秦巴不忍而與其母孟孫適至求麕
不得大怒逐之 史記曰孟嘗君過趙平原君客之趙
人聞孟嘗賢出觀皆笑曰始以薛公為魁梧也今視之
乃眇小丈夫耳孟嘗君聞之怒客與俱者下斫擊殺數
百人遂滅一縣以去 又曰鄒陽上書于梁王曰蘇秦
相燕燕人惡之于王王按劍而怒食以駢騑 漢書曰

項羽令將壯士出挑戰漢有善騎射曰樓煩楚戰三合樓煩輒射殺之羽大怒自被甲執戟挑戰樓煩欲射羽羽瞋目叱之樓煩目不能視手不能發走還壁中不敢復出又曰沛公使張良獻璧項羽羽受又獻玉斗於范增增怒撞其斗起曰吾屬今為沛公虜矣又曰黥布反上自征壁庸城與布相望見遙謂布曰何苦而反曰欲為帝耳上怒罵之遂大戰布軍敗走東觀漢記曰有詔會議靈臺所處上謂桓譚曰天下事吾欲讖決

之何如譚極言讖之非經上大怒曰桓譚非聖無法將
下斬之譚叩頭流血良久得解 又曰戴憑為侍中數
進見問得失憑曰將薄清亮忠孝學通古今陛下納庸
受之譖遂致禁錮世以是為嚴上怒曰子欲復黨乎憑
出自繫廷尉詔引見即敕尚書解遵禁錮 又曰竇憲
恃宮掖聲勢遂以賤直奪沁水公主園公主不敢訴後
肅宗駕出過園指以問憲憲陰唱不得對後發覺帝大
怒召憲切責曰今貴主尚見枉奪何況小臣乎 又曰

和熹鄧后臨朝杜根以安帝年長宜親政事乃上書直諫太后大怒收根盛以縑囊于殿上撲殺之執法者私語行事人使不加力既而載出城外因逃竄 魏志曰夏侯惇從征呂布為流矢所中傷左目時夏侯淵與惇俱為將軍軍中號惇為盲夏侯惇惡之每覽鏡恚怒輒撲照著地 魏紀曰司馬懿與諸葛亮相守百餘日亮數挑戰懿不出亮乃遺懿巾幘婦人之飾懿怒上表請戰帝使衛尉辛毘杖節為軍師以制之 吳志曰呂蒙

少依姊夫鄧當年十五六竊隨當擊賊當顧見呵叱不能禁止歸以告蒙母母恚怒欲罰之蒙曰貧賤難居設有功富貴可致但不探虎穴安得虎子母哀而舍之

又曰孫權既為吳王歡宴之末自起行酒虞翻伏地佯醉權去翻起坐權大怒手劒欲擊之曰曹孟德尚殺孔文舉孤于虞翻何有哉 晉書曰王導妻曹氏妬導憚之乃密營別館以處衆妾曹氏知而將往焉導恐遽令命駕以所執麈尾柄驅牛而進司徒蔡謨聞之戲導曰

朝廷欲加公九錫導弗之覺但謙退而已謨曰不聞餘物惟有短轅犢車長柄塵尾導大怒謂人曰吾往與羣賢共遊洛邑何曾聞有蔡克兒 又曰却超實黨桓氏以父愾忠于王室不令知之將亡出一箱書付門生曰本欲焚之恐公年尊必以傷愍為弊我亡後可呈此箱不爾便燒之愾後果哀悼成疾門生依旨呈之則悉與溫往反密計愾于是大怒曰小子死恨晚矣 又曰周訪為荊州刺史王敦以訪名將勲業隆重有疑色郭舒

說敦曰荊州用武之國公宜自領敦從之訪大怒敦手
書譬釋并遺玉環玉枕以申厚意訪投枕于地曰吾豈
賈豎可以寶悅乎 又曰陶侃嘗出遊見人持一把耒
熟稻問用此何為人云行道所見聊取之耳侃大怒曰
汝既不佃而戲賊人稻執而鞭之 齊書曰世祖在便
殿用金柄刀子剪爪王晏在側曰外聞有金刀之言恐
不宜用此物世祖愕然窮問所以晏曰袁彖為臣說之
上銜怒良久彖到郡坐匿用祿錢免官 後魏書曰李

彪之入京也孤微寡援而自立不羣以李冲好士傾心宗附冲亦重其器學禮而納焉每言之高祖公私共相援益及彪為中尉兼尚書為高祖知待便謂非復藉冲而更相輕背唯公會斂袂而已冲頗銜之後冲震怒數責彪前後愆悖瞋目大呼投折几案詈辱肆口冲素溫柔而一旦暴恚遂發病荒悖言語亂錯猶扼腕叫詈稱李彪小人醫藥所不能療或謂肝臟傷裂旬有餘日而卒通鑑宋紀曰寇準在鎮值生辰造山柵大宴又服

用僭侈為人所奏帝怒謂王旦曰寇準每事欲效朕可
乎旦曰準誠賢其如騃何帝意解又曰馬知節與王
欽若爭論上前退見王旦詞色猶怒甚曰知節幾欲以
笏擊死之但恐驚動君相耳又曰晏殊從幸玉清昭
應宮從者持笏後至殊怒以笏擊之折齒為御史所論
出知宣州又曰哲宗時邢恕為太后姪公繪作書上
太后乞尊禮高氏太后怒罷恕又曰建中靖國時曾
布端主紹述欲引陳瓘附己瓘投書畧曰足下尊私史

而壓宗廟緣邊費而壞先政此二者足下之過也布讀之大怒且嘻笑謂曰此書他人得之必怒布則不然雖十書不較也 又曰林攄使遼時蔡京使其激怒以啓

釁攄遂恣情不遜遼人大怒空客館絕烟火三日乃遣還 元史列傳曰托壘遣綽布干詣宋假道且約合兵宋殺使者托壘大怒曰彼昔遣苟夢玉來通好遽自食言背盟乎乃分兵攻宋 又曰新濟為行御史臺持風憲湖東僉事三寶珠性廉介御史有以私請者拒不納

則誣以事効之章至新濟怒曰若人之廉孰不知之乃敢為是言邪即奏杖御史而白其誣

怒三

增伐齊

侵蔡

國語晉卻獻子如齊聘齊頃公使婦人觀而笑之獻子怒歸請伐齊范武子退

自朝曰卻子之怒甚矣不逞于齊必發諸晉國不得政何以逞怒余將致政焉以成其怒也傳齊侯與蔡姬

乘舟于園蕩舟公懼變色禁之不可公怒歸之未之絕也蔡人嫁之齊侯以諸侯之師侵蔡蔡潰

釋

憾破陰

淮南子人之性有侵犯則怒怒則血充血充則氣激氣激則發怒發怒則有所釋憾矣

又大怒破陰

投牀

橫刀

傳郭莊公與夷射姑飲酒私出聞乞肉焉奪之杖以敲之公在

門臺臨庭閣以瓶水沃庭邾子望見之怒閭曰夷射姑旋焉命執之弗得滋怒自投于牀

媚嫉

恚憤

柳文超取顯美欲免世之求進者怪怒媚嫉可得乎彙苑安祿山反張介然守陳留有詔購賊首

而暴誅慶宗狀祿山入陳留見詔書撫膺大哭曰我何罪吾子何罪乃殺之即大恚憤殺陳留降者萬人以逞血流成川斬介然于軍門折筯拂衣唐舊史廣德公主與帝食

人妻乎更許于琮尚主彙苑鄭畋遷門下侍郎高駢請如西戎以公主下嫁南蠻畋與盧攜入議之畋以損

國威靈不可攜怒拂衣去裾蟻于射彭生拘蘭子硯因抵之帝以大臣爭口語俱罷

齊侯田于貝丘見大豕從者曰公子彭生也怒曰彭生敢見射之列宋有蘭子者以技干宋元君賜金帛又

有蘭子能燕戲以千元君元君大怒曰彼必復望吾賞拘而擬戮之逐獻公鞭冉閔

傳衛獻公戒孫文子甯惠子食皆服而朝日盱不召而射鴻于囿二子從之不釋皮冠而與之言二子怒公出奔齊崔鴻後趙錄冉閔為慕容恪所擒慕容儁立問閔曰汝奴僕不才何自妄稱天子閔曰爾曹人面獸心欲篡逆我一時英雄何為不作帝王邪儁怒鞭之三百

原髮上衝冠 髯奮抵

几 史記藺相如怒髮上衝冠 朱博怒齊吏髯奮抵几

伏屍流血 授兵登陴

國策秦王謂唐雎曰伏屍百萬流血千里天子之怒也雎云大王嘗聞布衣之怒乎王曰布衣之怒亦免冠徒跣以頭搶地耳雎曰此庸夫之怒非士之怒也若士必怒伏屍二人血流五步 左傳今執事撓然授兵登陴將以誰罪注 撓勁怒貌

怒四

原愆忿

易損卦曰愆忿室愆注可損之美莫大于忿忿

無悔

詩宜無悔怒

不宜

有

又黽勉同心不宜有怒

內異

又內異于中國注異音被不辭而怒曰異

如怒

又君

子如怒

不怒

禮記神則不怒而威

武怒

武奮其怒

譴怒

憑怒

闕如虢虎

詩王奮厥武如震如怒闕如虢虎

將子無怒

逢天俾怒

詩儼厚也

逢彼之怒

敬天之怒

並詩

不可犯

傳衆怒不可犯難犯

也

衆如水火

左傳衆怒如水火

怒生于兩

怒市于色

左傳

令尹子瑕言蹶由于楚子曰彼何罪諺所謂怒于室家而作色于市人

甯成怒

彙苑甯成拜關

都尉謠曰甯值乳虎無值甯成怒

增宗族皆怒

鄧晨與上起兵新野吏乃燒晨先祖祠堂

洿池室宅焚其塚墓宗族皆怒曰家自富足何故隨婦家入湯鑊中晨終無怒色

將士咸怒

蜀志姜維為鄧艾所推還陰平尋被後主勅命乃投甲詣會于涪軍將士咸怒拔劍斫石

無怒
孫晉

登傳登性無恙怒人或投諸水中欲觀其怒既出便大笑

市怒

唐劉武周傳宣言于衆以市怒其軍

不塞衆怒

柳宗元貽蕭俛書聖朝寬大貶黜甚薄不塞衆人之怒

力相并

藩鎮

表怒則以力而相并

天怒

吳武陵遺孟簡書古稱一世三十年子厚之斥十二年殆半世矣霆殛電

射天怒也不能終朝安有聖人在上畢世而怒人臣者耶

銜怒

彙苑楊收王鐸皆薛逢同年進士收

作相後逢有詩云須知金印朝天客同是沙隄避路人威鳳偶時皆瑞聖應龍無水謾通神收聞大銜之

碎玩好

通鑑宋紀蔡京獻太子以大食國琉璃酒器羅列宮庭太子怒曰天子之大臣不聞以道義相

訓乃持玩好之具蕩
我志耶命左右碎之

恐懼一

增新序曰白公之難楚人有莊善者辭其母將往死之
比至公門三廢車中其僕曰子懼矣曰懼何不反乎善
曰懼者吾私也死君公義也吾聞君子不以私害公遂
至公門刎頸而死 東觀漢記曰龐萌還攻葢延延與
戰破之詔書勞延曰龐萌一夜反叛相去不遠營壁不
堅殆令人齒擊而將軍有不可動之節吾甚美之 吳

志曰劉備詣京口見孫權求都督荊州權借之共拒曹操操聞以土地借備方作書筆落于地通鑑宋紀曰中丞王安中上疏言蔡京欺君僭上蠹國害民數事帝悚然納之已而再疏京罪帝曰本欲即行卿章以近天寧節俟過此當為卿罷京京伺知之大懼其子攸日夕侍禁中泣拜懇祈帝為遷安中翰林學士

恐懼二

原股戰 心憂

魏勃詩知我者謂我心憂

可畏 不懾

禮有威可畏又

詩亦可畏也不足畏也

禮

悄悄

惴惴

詩憂心悄悄惴惴于羣

小又惴惴其慄

搶攘

惴恐

貌不安

忡忡

惴惴

詩憂心忡忡

又憂心惴惴

增隱憂

善懷

詩如有隱憂又女子善懷

殷殷

奕

奕

又憂心殷殷盛貌又憂心奕奕

欽欽

蛩蛩

又憂心欽欽辭蛩蛩憂愁貌

楚

窈糾

惓受

詩舒窈糾兮幽愁結也又舒惓受兮憂深思遠

惓惓

恤

恤

又勞心惓惓書經憂心無已貌

孔疚

沈憂

詩憂心孔疚詩沈憂令人老

古

鰾鰾

楚楚

文選鰾鰾驚恐貌朝野楚楚不安之意也

鬱邑

纏綿

楚辭鬱邑憂思結也

文選憤久結之纏綿

寤懷

淵抱

楚辭惟極浦兮寤懷庾信愁

賦三命
戒淵抱

跼高天 踏厚地

詩謂天蓋高不敢不跼
謂地蓋厚不敢不踏

徊徨徨

悚悚猓猓

文選徊徨徨皆驚恐貌
魂悚悚而驚形心猓猓而發悸

恐懼三

原因于艱晚

易

如臨深淵

詩如臨深淵
如履薄冰

如醉如醒

詩憂心如醉
憂心如醒

心之憂矣

詩

增百罹

詩

如擣焉

又怒

擣

如噎

又憂心如噎憂深不
能喘息如噎之然

原若蹈虎尾

書

涉

于春冰書

增胥感

書保后
胥感

如燕巢幕

危懼

慰啓

楚辭慰啓
鬱悶也

怵鬱

又怵鬱
憂思

墮螭

又怵惕不
自安貌

愕眙

文選

愕眙驚惶
而張眼貌

勞結

又未足解
其勞結

輒張

又輒張
驚懼貌

御定淵鑑類函卷二百六十五

謹案第二十六頁後五行將就未矣刊本木訛來

據賦彙改

第三十一頁前七行沃饒而近鹽刊本鹽訛鹽據


左傳改

第三十五頁後三行日日逐春深刊本深訛風據

溫飛卿集改

第六十一頁前五行亦免冠徒跣刊本冠訛官據

國策改



總校官庶吉士

臣

張能照

校對官庶吉士

臣

陳墉

· 謄錄監生

臣

楊師曾